

YAMARAM CHICHAM

MARCOS AARMAU

Juan imakratin aya nugkanmag wekaas jintinkartuamu

(Mt 3.1-12; Lc 3.1-17; Jn 1.19-28)

1 ¹Jesucristo Yuusa uchiriya nuna chichame pegkera nuka junii nagkamnawaiti. ²Yuusa chichamen etserin Isaías tu aaruiti: “Wina chichamrun etsernun emtikan, ni jintan umirtamkati tusan aku-peajai”.

³Shuar emak taa aya nugkanmag wekaas senchi chichaak: “Apu jintiya nu tutupin atii tusa-rum shir umiktarma, japau akaisha nugka yaruakrum aimratarma”.^a

⁴Nu tusa timau asamtai, Juanka aya nugkanmag entsa Jordánnum shuarnaka ima imakua taawaiti. Shuar ainan Juan chicharuk: Atum tunau takasmauncha Yuus tsagkurtamrarti, tunau takat inaiyakrum enentaim yapajiatarma, tumarum maitarma tusa tinaiti. ⁵Nuna antukar Judea nugkanmaya ainaka, yaakat Jerusalénnumia ainasha ashi

kaunkaruuti. Tuma kaunkar nita tunau takatairi ainan etsertumakarmatai, entsa Jordánnum Juan imakaruuti. ⁶Juanka camello ure najanamun nugkujakuuti, akachum-tairisha nuap najanamu ajakuuti, manchin yu jakuuti, tura napa yumirincha umin ajakuuti. ⁷Shuar ainan chicharuk: “Wina ukuruin wina nagkatasu winittawai. Wika niya imanchau asan, nuna zapatorinka atitmaitsujai. ⁸Wika ayatik entsajai imajrume, turasha nigka Wakan Pegkeran suramsattarme”, tusa tinaiti.

Juan Jesúsán imaimu

(Mt 3.13-17; Lc 3.21-22)

⁹Chikich tsawantai Jesús yaakat Nazaret Galilea nugkanmaya jiinki Juan pujamunam wuwaiti. Tuma jeamtai Juan entsa Jordánnum imain. ¹⁰Tura imaim entsanmaya jiinkama, nayaim uranmatai pauma numamtinan ninii taarun Wakan Pegkeran wainkauwaiti. ¹¹Nu tumaig Yuus nayaimpinam pujusag chichaak: “Ametme wina uchir

^a 1.3 Isaías timauwa nuka Juankan pachis eke akiintsag chikichik shuar aya nugkanmag wekas senchi chichaak: Ashi shuar ainaka tunau takat aina nuna inaiyainak uwemtikartina nuna juinak pujutin yapajiwarti taku tinaiti.

anetaimka, nui amini shir anejai” tusa tamau antukauwaiti.

**Iwanch Jesúsán
tsanurtasa nekapsamu**

(Mt 4.1-11; Lc 4.1-13)

¹²Nuna timatai Wakan Pegker egkemtur wári juki aya nugkanmag shuarsha atsamunam umauwaiti.

¹³Nui Jesús cuarenta tsawantai uun yawa kajen aina matsatmaunam pujaun, iwanch Satanás tsanur tunaun takaamtiksattsa nekapsau. Turamtai nayaimpinmaya shuar aina kuitamawartasa taruawaruiti.

**Jesús Galileanam ni
takatrin nagkamamu**

(Mt 4.12-17; Lc 4.14-15)

¹⁴Juankan achikar cárcelnum egkeawaru ai, Jesús chichaman pegkeran Yuusan pachis etserkat-tsa Galileanam wuwaiti. ¹⁵Tuma chicharkartak: “Yuus timauwa nuka tsawan jeayi, tura Yuus shuarum inamratnuka tsawan ashi jewai. Tuma asamtai pujutrum yapajiarum, chicham uwentikartina nu nekaspa-pita titarma”, tusa tinaiti.

**Jesús ni unuinatairi
atin ainan wainkamu**

(Mt 4.18-22; Lc 5.1-11)

¹⁶Jesús Galileanam kucha tsukin-trin wekajkama, Simónkan ni yachi Andrésjai, namakramin asar, kuchanam redtan nagkimainak yujattamaun wainkau. ¹⁷Tuma chicharuk:

“Yamai nagkamsarmeka nama-kramat inaiyakrum wina nemartuktarma, tumarum Yuusa chichame shuar aina ujaw ataarma”, tusa tinaiti.

¹⁸Tusa tamauwaik nita redtrin ajapa ikuinak nijai wearuiti. ¹⁹Jesús

nitajai iruunar ishichik wesag Zebedeo uchirin, Jacobon ni yachi Juanjai, boterin chumpimsar redtrin apainak chumpimatmaun wainkau.

²⁰Tura nunasha chicharuk:

“Wina nemartuktarma”, tusa tama, nita apari Zebedeonka nitajai takau ainan botenam ajapa ikuinak Jesúsjai wearuiti.

Shuaran iwanch egkemtuamu

(Lc 4.31-37)

²¹Tumawar yaakat Capernaúmnum jeawaruiti. Nui jeawar ayamtai tsawan tsawarmatai, iruuntai jeanam wayaa Jesús jintinkartutan nagkamawaiti.

²²Tura chicham umiktinan jintinkartin ainan nagkas, Yuusa senchirijai jintinkartau asamtai, shuar ainaka nuna antukar enentai jearcharuiti. ²³Nui iruuntai jeanam iwanch egkemtuamu shuar eketu asa senchi chichaak:

²⁴“¡Jesús Nazaretnumia! ¿Urukamtai amesha ii pujamunmasha winame? ¿Ameka ina jiikratkittsamesk winame? Inaikartusta. Wika nekajme, ameka Yuusnumia winau asam, nekas Pegkeraitme”, tusa tinaiti. ²⁵Tusa tama iwanchin ayak:

“Takamtak jiinkim weakum nu shuar ikukta”, tusa tinaiti. ²⁶Tusa tamauwaik nitasha ashi wainainaig, shuaran nugkanam ajaruiti. Turasha ishichikisha najaimamtiksuk jiinki weak ikuknaiti. ²⁷Tumamtai ashi wainkar senchi ashamkar enentai jearcharu. Tumawar nitak chichainak:

“¿Chichamesha uruku asamtaiya iwancha anturainawa? ¡Apu chichaimaina imatak chichakaimpa iwancha umirainawa!” tusa tuina.

²⁸Nu turamun wainkar, shuar ainaka ashi Galileanam Jesús turayi tusar etseraruiti.

**Jesús Simón Pedro tsatsari
jan pegker amajtusmau**

(Mt 8.14-15; Lc 4.38-39)

²⁹Tura iruuntai jeanmaya Jesús, Santiago Juanjai jiinkiar, Simón Andrésjai pujamunam wearuiti.

³⁰Nui Simónkan tsatsari tsuweak tepau, tuma asamtai Jesúsán chicharainak:

“Simónka tsatsari tsuweak tepawai”, tusar ujakaruiti. ³¹Nu tama Jesús jeari uwejum achik inankin. Nu turamuik tsuwearmun michatar pegker jas, nantaki yurumkan inarak shuar Jesúsjai yujan ayurawaiti.

Nukap shuar pegker amajsamu

(Mt 8.16-17; Lc 4.40-41)

³²Nu tsawantaik kintamai, ja ainan, tura iwanch egkemtumu ainajaimak Jesúsán ashi ikaatkaruiti. ³³Turawar ashi shuar ainaka waitinam iruuntraruiti. ³⁴Tumawarmatai ja ainan pegker amaju, tura iwanch ainancha jiiitra shiaktarma tusa tinaiti. Iwanchka Criston nekaina, turamu asa chichakcharti, tusa tinaiti.

**Jesús Galileanam Yuusa
chichame etserkamu**

(Lc 4.42-44)

³⁵Yama tsawak eke suamut aig nantaki, yaaktan ikuak kanaki shuar atsamunam aparin aujsattsu wuwaiti. ³⁶Tumamtai Simón ni amikri ainajai eainak wearuiti. ³⁷Tumawar Jesúsán wainkar chicharainak:

“Ashi shuar eatmainawai”, tusa tuina. ³⁸Nu tusa tama ni chichaak:

“Yaakat jeashtachu aina aisha wearmi, tumar Yuusa chichame etserkarmi, wika juna etserkatsan juigka tawaitjai”, tusa tinaiti.

³⁹Jesúska ashi Galileanam weká jakuiti, tura chiki chikichik yaaktanam jeakka, nita iruuntairin wayaa Yuusa chichamen etsereak, iwanch ainancha jiir ishimajakuiti.

**Shuar leprajai ja
pegker amajsamu**

(Mt 8.1-4; Lc 5.12-16)

⁴⁰Shuar lepra tukumau jak pujau Jesúsán wainak tikishmatar chicharuk:

“Apu, ame wakerakmekka winasha pegker amajtumainaitme”, tusa tinaiti. ⁴¹Tusa tama Jesús wait anentar, uwejejai jan achiak:

“Wakerajai, yamaika pegker jasta”, tusa tinaiti.

⁴²Tamauwaik wári ashi iyashigka chimik pegker jasuiti. ⁴³Tumamtai Jesús ikuak akateak:

⁴⁴“Wetá, turasha chikich shuar ainaka ujatsuk Moisés timauwa nu metek umiakum sacerdote pujamunam jeata. Nuka tu aarmauwaiti: Ashi shuar leprajai ja pegker jasuka tuke tumasarke artinaiti. Tura chikich ainasha wainainak nekaspapi pegker jasia tiarti”, tusa tinaiti.

⁴⁵Nu tusa timaitiat, ni pegker jasmaurin pachis ashi shuar ainan ujaku. Nuna imatika etserkau asamtai, Jesúska wantinak yaaktanmasha waimainchau jas, nigka ayatik yaaktan arinig shuar atsamunam weká. Turasha chikich yaaktanmaya ainasha Jesúsán wainkartasa iruuntuina.

**Jesús shuar wekaichun
pegker amajsamu**

(Mt 9.1-8; Lc 5.17-26)

2 ¹Nuna tura ujumchik tsawan pujus, Jesús waketki ataksha Capernaúmnum jeau, tumamtai



(Mr 2.4)

nukap shuar ni pujamurin nekaawar,
²wári iruuntrar jeanmagka waitinam
 nagkamsar, chikichkiksha wayaach-
 minu piakaru. Imanikarmatai Yuusa
 chichamen nita ainan ujakuiti.
³Nuna tumai cuatro shuar wekai-
 chun Jesús pegker amajsatí tusar
 jukiari itariaruiti. ⁴Tumawar waitin
 waimainchau akirawarmatai, tujig-
 kar jea tuntupeen wakar jean chig-
 kainiar, jaanchin tampumruawar
 Jesús pujamunam akakiaruiti. ⁵Nuna
 turuinak nigkiapi pegker amajsat-
 tawa tusar enentaimainan Jesús
 nekau asa, wekaichun chicharuk:

“Aishmagku, yamaika amina tunau-
 rumnaka tsagkurajme”, tusa tinaiti.

⁶⁻⁷Nuna takai, chicham umikti-
 nan jintinkartin aina irunu asar
 nitak enentaimsar: “¿Urukamtaig
 nunasha tusha chichaawa? Yuusan
 pegkerchau chicharuk tu weká jama
 shuara tunaurin tsagkurmainka chi-
 kichka atsawai. Antsu ima Yuusketi
 tunaurumnaka tsagkuurajme tusa
 tukartumainka”, tu enentaimaina.
⁸Turasha Jesúska nita enentaim-
 maurin nekau asa chicharuk:

“¿Urukamtai atumsha tusha enen-
 taimrume? ⁹Shuar ja chicharkur:

Amina tunaaurum ainanka yamaika tsagkurajme tusa tuta nuka yupichuiti. Turasha shuarka nantaki jaanchrin juki weti tusarka pegker amajmaitsui. ¹⁰Wika shuarnum akina asan, ju nugkanam shuara tunaaurincha tsagkurmainaitjai. Tuma asan atumin yamai iwaintuktajrume tusa”, wekaichun chicharuk:

¹¹“Nantakim jaanchrum jukim jee-min waketkita”, tusa tinaiti.

¹²Tusa tamauwaik wekaichu itaamusha nantaki jaanchrin juki ni jeen waketkin. Nu wekaichau pegker jasmatai, chikich ainasha wainkar, enentai jearcharu. Tumawar Yuusan emematainak:

“Juna jutikaka pegke wainkachuitji”, tusa tuina.

Jesús Mateon untsukmau

(Mt 9.9-13; Lc 5.27-32)

¹³Tura nuna inagkaki Jesús ataksha kucha tsukintrin wuwaiti, nuisha shuarka imanik iruunturaru, turam jintintu. ¹⁴Tuma nagkamajkama Leví, chikich naari Mateo, Alfeo uchiri, apunu atinan akikmamun kuitan yarumin asa, kuit juaku ekeemtainam eketun wainkau. Tura wainak:

“Weajai, wina nemartukta”, tusa tinaiti.

Tusa tutai Levísha ni takaamurinka ikuak, Jesúsán nemarkauwaiti.

¹⁵Tuma nu tsawantaik Leví ashi amikri apunu atinan kuitan yarumin ainan chicharuk: Wina jearui kaunkatarma yurumak Jesúsjai iruuntura yuawarmi tusa ipa. Nuna timatai amikri ainasha kaunkaru, tumawarmatai Jesús mesanam

ekeemas ashi ni unuinatairi ainajai chikich shuar tunaaurintin aina nukap saatukmau asa, iruunar mesanam jeantar ekeemsaruiti. ¹⁶Tuma chicham umiktinan jintinkartin aina, fariseo ainajai Jesús nu shuarjai iruuntur yuan wainkar, Jesúsán unuinatairi ainan chicharainak:

“¿Urukamtai atumin jintintram-nusha au shuar apu kuitri atinan yarumin ainajaisha, chikich shuar tunaaurintin ainajai iruuntursha yurumkan yuawa?” tusa tiaruiti.

¹⁷Nu tusa tuinamun Jesús antuk chichaak:

“Shuar jachu pegker ainaka tsuakratnunka atsumchau ainawai, antsu shuar ja aina tsuakratnunka atsumin ainawai. Wika shuar tunaurinchau ainanka taruachuitjai, antsu shuar tunaaurintin aina tunaaurin inaiyainak pegkermakati tusan taruawaitjai”, tusa tinaiti.

Ijarma pujamu pachisa inimsamu

(Mt 9.14-17; Lc 5.33-39)

¹⁸Chikich tsawantai, Juankan unuinatairi aina, tura fariseo unuinatairi ainajai Yuusa seartasa ijar-mawar matsataina. Nuna tumaina ujumak shuar Jesúsán jeariar ininak:

“¿Urukamtai Juankan unuinatairi aina, tura fariseo unuinatairi ainasha ijarmainaisha, ame unuinatairam ainasha ijarmainatsua?” tusa tuina.

¹⁹Nu tusa tama Jesús nitan ayak:

“Shuarka nuwa nuatku ipaamu irar ainaka shuar nuweenatin pujaigkika, yutsukka iruunmaitsui.

²⁰Antsu ipaamu ainasha nuwenatin

jiistamuk ipaaman tsawan jeam-tai jukiartata nui, wake mesemar nekapenak ijarmawartin ainawai.^b
²¹ Tusa tina chikichnasha pachis chichaak: Jaanch yamaram asa nijam jujuak sumpeak, jaanch mamurun nu senchi jaamain asamtai, jaanch yamarman tsupikar mamurunka anujtichu ainawai. ²² Nuap aparmau arutmaraunmagka, umutai vino yama umika yara aimka ikukmaka kariak, saurkusha nuap arut asa wagkaki weachu asamtai apujmainaiti tusa Jesús tinaiti”.^c

Ayamtai tsawan pachisa timau

(Mt 12.1-8; Lc 6.1-5)

²³ Ayamtai tsawantin Jesús nina unuinatairi ainajai trigo arakmaunam uturar jinta nu nagkamatai asamtai wenak, ni unuinatairi aina tsukamainak, trigon kupik jukiar, neren akarar yurkuta wena. ²⁴ Tumainan fariseo aina wainkar chichainak:

“Iisiana, ayamtai tsawantinka takantsashti timau aisha, ¿urukamtai amina unuinatairam ainasha, nuna umitskesha takainawa?” tusa tuina. ²⁵⁻²⁶ Nu tama ni ayak:

“¿Atumka Yuusa chichamen aar-mauwa nuka aujsachuk ainarum, Abiatar sacerdote apuri jas pujai, yaunchuk ina apachri David tsukamak, tura nijai tsanig yujasha tsukamainakai, Yuus ememattasa iruuntai jeanam wayaa pan pegkermantikamu ima sacerdote yutainak, ni juki yuak, shuar nijai yujainancha ayurkauwa nuka aneaktsurmek?

²⁷ Ayamtai tsawanta nuka shuar aina ayamrarti tusa aitkamuiti. Yuuska shuar ainanka ayamtai tsawanta nuna umirainak wait-tsarti tusagka tichauwaiti. ²⁸ Tuma asamtai wika Yuusan uchiriyaitiatan shuarnum akina asan, ayamtai tsawan tsawarmataisha urukmainkit nuna tumainnaka wikitjai”, tusa tinaiti.

Shuar uweje chuiru pegker amajsamu

(Mt 12.9-14; Lc 6.6-11)

3 ¹ Jesús iruuntai jeanam ataksha wayaawaiti, tuma shuar uweje chuiru pujaun wainkauwaiti. ² Turamtai fariseo aina ayamtai tsawanta juisha, iturkatig pegkerash amajsat, pegker amajsamtaigka Jesúska tunaun takáwai tiartasa ii iruuntuina. ³ Tumainaig Jesús shuar uweje chuirun chicharuk:

“Wajakta, tumam ajapeen wajasta”, tusa tinaiti.

⁴ Nuna tina shuar ainan iniak:

“¿Ayamtai tsawan tsawaru aisha iturmainaita? ¿Pegkerchau takaa-krik pegker takatsuk inaimainkait? ¿Ayamtai tsawan tsawarai tusarik, shuar jakaisha jakati tusarik inaimainait? ¿Pegker amajmainchaukait?” tusa tinaiti.

Nu tusa tamasha nitaka aikcharu. ⁵ Nuna taku Jesúska shuar ainanka kajek iisu, turayat shuar antutan nakitaina asarmatai, wake mesemar nekrapau. Nuna tumayat shuar uweje chuirun chicharuk:

“Kunturam nakuekta”, tusa tinaiti.

^b 2.20 Nunaka Jesús nigki pachimas taku tinaiti. ^c 2.22 Nunaka fariseo aina umitairi yaunchuk a jakua nuka umimaitisui, antsu chicham yamaram Jesúsnauwa nu umimainaiti taku tawai.

Nu tama kunturin nakueku. Nu tura-muik uwejegka pegker jasuiti. ⁶Nuna turamtai, fariseo ainaka Jesús man-tamnati, tusar Herodes weantu ainajai chichaman umikartasa jiiintraruiti.

**Jesúsán wainkartasa
nukap shuar aina kucha
tsukintrin kaunkamu**

(Mt 4.24-25; 12.15-51; Lc 6.17-19)

⁷Tumainai Jesúska ni unuinatairi ainajai iruunar kucha tsukintrin wuwaiti. Tumamtai Galileanmaya shuar aina tura Judeanmaya shuar ainasha nukap patatukaruiti. ⁸Jesús nu wekaas nukap iwainaka taká-mun antukar Judeanmaya, Jerusa-lénnumia, Idumeanmaya, Jordán amain matsamin aina, Tironam, tura Sidónnum tiiju matsamin ainasha nitasha wainkartasa winitaina. ⁹Imanina asamtai shuar aina channuntawarai tusa, Jesús ni unuinatairi ainan chicharuk:

“Bote shir umikrum inanastarma”, tusa tinaiti. ¹⁰Jesús shuar ja ainan nukap pegker amajsau asamtai, ashi shuar ja ainaka nina antigkartasa kakanmamaina.

¹¹Iwanch egkemtuamu aina Jesúsán wainkar ni emtin tikishmatrar, senchi chichainak:

“Ameka Yuusa uchiriyaitme”, tusa tuina. ¹²Turasha Jesús nitan chicharuk: Shuar aina ashi antuinamunmagka turutirpa tusa tinaiti.

**Jesús ni unuinatairi
ainan doce etegkramu**

(Mt 10.1-4; Lc 6.12-16)

¹³Nuna tura Jesús nain waka ni wakeramu ainan etegkar yaruaku,

turam nitasha nijai nainnum wakarú. ¹⁴Nui nainnum doce shuaran yaruak: Atumka winau unuimartarma, tumarum wina chichamur etserkatarma tusa akupkatnurrin etegkrawaiti. ¹⁵Tura iwanch shuaran egkemtuasha jiiiktarma tusa senchintikkawaiti. ¹⁶Jesúsá unuinatairi doce ajakarua nuka ju ainawai: Simón, Jesús Pedro atá tina nu, ¹⁷Jacob, Juan, mai Zebedeo uchiri, Boanerges tutaí ajakarua nu, (Boanerges ta nunaka ipamta uchiri taku tawai). ¹⁸Tura Andrés, Felipe, Bartolomé, Mateo, Tomás, chikich Jacob Alfeo uchiriyá nu, Tadeo, chikich Simón ni nugken agkamamtikattsa chichamru jakua nu, ¹⁹Judas Iscariote Jesúska tu achikrum maatarma tusa shuar ainajai chichaman umirkauwa nu, imajin ajaku ainawai.

**Shuar aina chichainak
Jesúska iwanch Beelzebú
senchiriyá nujai iwanchnaka
jiiyawai timau^d**

(Mt 12.22-32; Lc 11.17-23)

²⁰Nuna umik nainnumia akaiki, Jesúska ni unuinatairi ainajai jea waya. Tumamtai ataksha imanisag shuar iruunturar, yurumkancha yumain amajainachu. ²¹Nuna antukar ni patai aina enentaimkachu jas wekatsuwash, tusar jukiartasa weriaru.

²²Nuiyasha chicham umiktinan jintinkartin Jerusalénnumia kaunkar, Jesúsán pachisar chichainak: “Iwanchi apuri Beelzebú naartina nuna senchirijai iwanchnaka jiiyawai”, tusa tuina.

^d 3.20 Iwanchi apuri ainaka ju ainawai: Satanás, Beelzebú tura Lucifer.

²³Tuinakai Jesús nuna antuk, nitan untsuk aujmatmaun pachis chichaak: “¿Urukakug mai iwanchikisha jinaimainaita? ²⁴Shuar nuu nugkanmag matsatiat, nitak maani matsatkugka, megkamain ainawai. ²⁵Tura chikichnasha titajai: Shuar nu jeanmag iruunar matsatiat, maani matsatkusha nitak megkamain ainawai. ²⁶Numamtuk iwancha ni senchirin wina surak, shuaran iwanch egkemtua ainan jirati turutkugka, nigki ninurinka tupanmainaiti, tumak ni senchirinka megkamainaiti.

²⁷Chikichik shuar kakaram, jeen kuitamuk, waitinam wajakaisa, ¿itursaya kasa wayasha warírincha jurumainaita? Nuna juruktaj takugka, yama nagkamchakka shuar jeen kuitamuk wajaun jigkar ajuan, nui jurumainaiti, nuna turutskeka jurumaitsui”.^e ²⁸Nekasa tajarme: “Shuar aina tunaun takainak, tura pegkerchau chichainasha nuka ashi tsagkuram artinaiti. ²⁹Turasha Wakan Pegkeran pachisar pegkerchau chicharainaka, nuka pegkesha tsagkuram achartin ainawai, tuma asar nuna tiaruka waitan jukiartin ainawai”, tusa tinaiti.

³⁰Nunaka Jesúska Wakan Pegkera nujai takaanak, iwanchin senchiriya nujai takaawai, tamau asa tinaiti.

**Jesúsa nukuri ni yachi ainajai
Jesúsán wainkartasa kaunkamu**

(Mt 12.46-50; Lc 8.19-21)

³¹Nuna tusa inagnaka ai, Jesúsa nukuri ni yachi ainajai Jesúsán wainkartasa kaunkaru, tumawar aag iruuntsar nui ujatruktarma tusa

tinaiti. ³²Nu tama nui irunu Jesúsán ujinak:

“Amina nuku, yatsum aina tura umaim ainajai eatmainak tawar, aa irunui”, tusa tuina. ³³Tusa ujam ni chichaak:

“¿Wina nukur tura yatsur ainasha nekascha yaita?” tusa tinaiti.

³⁴Nuna tina nui irunun iis chichaak:

“Wina nukurka, tura wina yatsur ainasha ju ainawai. ³⁵Wina yatsur, wina umaar tura wina nukur ainaka Yuus wakeramua nunak takaina nu ainawai”, tusa tinaiti.

**Arakan arakmau
pachisa jintinkartuamu**

(Mt 13.1-9; Lc 8.4-8)

4 ¹Nuiya jiinki Jesús shuar ainan jintintaattsu kucha tsukintrin wuwaiti. Tumakai shuar ni pujamunam nukap kaunkaru. Tuma-warmatai Jesús botenam egkemar nui ekeemsantai, nu imanik shuar kaunkaruka yaikminam iruuntrar. ²Tumawarmatai aujmatmaun pachis jintinkartau asa, arakan arakmaun pachis chichaak:

³“Jusha shir antuktarma. Arakan arakmau arakan jigkain juki, ajariin nagkimak ikuuttsa wuwaiti. ⁴Tuma we ajariin araka jigkain nagkimak ikuknaiti. Nu arakan jigkai nagkimam jintanam kakekaruiti. Tuma naka chigki kautak amukuiti. ⁵Chikichka nugka kayar-nunam kakekaruiti, nu tumawaruka wári tsapakaruiti. ⁶Turasha etsa etsantuk kagkape init achimrachu asamtai, aesak ijinawaiti. ⁷Tura chikich ainaka jagki irunmaunam

^e 3.27 Nunaka Jesúska iwanchin nagkasau senchirtin asa tinaiti.

kakekaruiti, tuma nusha tsapai-niartatmaun jagki tsapainak yutuaruuiti turam jinawaruuiti. Turamu asa arakka nerekaruuiti. ⁸Turasha nugka pegkernum kakekaruka shir tsapainiar, chikichik jigkai iyaaruuitiat nukap nerekaruuiti. Tuma asa chikichikitak treinta jigkain, tura sesenta jigkain, tura cien jigkain nerekaruuiti, tusa tinaiti. ⁹Nuna ashi jintinkartua ashimak chichaak: Wii taja nuka shir enentaimsarum iis-tarma”, tusa tinaiti.

Jesúa unuinatairi aina arakan arakmau pachisa inimsamu

(Mt 13.10-17; Lc 8.9-10)

¹⁰Nuna tina inagnakmatai chikichka shimuinai ujumak shuar juakaru. Tumawaru ai ni unuinatairi aina ininak: ¿Arakan arakmau pachisam jintinkartam nusha wari takumea timame? isha shir nekaatsar wakeraji, ujakratkata tusa tuina. ¹¹Nu tama Jesús nitan chicharuk: “Atumka winau asaakrumin, Yuus inammaurin pachisan timaj nunasha nekantikramatssa wakerutmarme. Turasha chikich ainaka nuna takumpapi tawa tusarka nekamain ainatsui.

¹²Wii nukap iwainaran pegker takámun wainainaksha, wainmachua numamtuk jainawai. Tura antuinaksha nunapi taku tawa tusarka enentaimas iyainatsui. Nuna tumainak nita tunaurin inaitan nakitaina asar, tsagkurachmau ainawai”.

Jesús arakan arakmau taja nunaka juna takun tajai tusa etserkamu

(Mt 13.18-23; Lc 8.11-15)

¹³Junasha chichaak: “¿Atum ju aujmattsa tamausha antatstrum

aniatirmesha wii chikichan aujmatstsan takaiasha, uruk antuktatrumea?

¹⁴Yuusa chichamen etserna nuka arakan arakmauwa numamtinaiti. ¹⁵Araka jigkai jinta kakekaun chigki kautak amuku timaj nunaka, shuar Yuusa chichamen antukiat, enentaimtutsuk pujaun iwanch tari Yuusa chichamen antukmaurin kajinmamtika nuna takun timajai. ¹⁶⁻¹⁷Arakan jigkai nugka kayarnunam kakekaruka nugka nukapchau amaunam wári tsapainiartatmaun, etsa etsantuk arakan kagkape inít achimrachu asantai, etsa sukua aeskau timaj nunaka, ujumak shuar aina Yuusa chichamen antukariat inaiyaina nuna takun timajai. ¹⁸⁻¹⁹Tura araka jigkai jagki iruunmaunam kakekaru timaj nunasha, shuar aina Yuusa chichamenka antuinayat, nitak tsanumainak wiakchamartsuk shir pujumainaitti tu enentaimaina asar, wiakchamattsar ima senchi wakeruina nuna takun timajai. Ashi ju nugkanmaya warí aina nu chicham pegker antukmaunka emegkawai. Tumau asantai wakannumsha tsakatsuk tunaamainawai. ²⁰Antsu araka jigkai nugka pegkernum kakekaru jinutsuk, ashi imanisag shir tsapainiaru asar, neretnasha imanik nerekaru timaj nunaka, ujumak shuar Yuusa chichamen shir antukar nekaspapita tuina asar, iturchat aruinamsha umamkesar, nepetak pujuina nuna takun timajai. Ujumchik shuar treinta, sesenta, cien jigkain nerekarua numamtincha ainawai”.

Uuka inaisamuka achatnaiti tusa timau

(Lc 8.16-18)

²¹Junasha chichaak: “Lamparín ekeemakrika peaka awamtakrin

apujtsatsarka ekeemashtaiya. Ekeemakrika jean ashi tsaptin amajtsati tusa, yaki ekentaiya. ²²Numamtuk tunau takasa uukmau ainaka wantintsukka asashtin ainawai. Chikichik uukmauksha tuke nekaachmauka asashtin ainawai. ²³Atum antutairi aramutirmeka antuktarma”, tusa tinaiti.

²⁴Nuna tajarum nu shir antuktarma. “Shuar nuna chichaman antukar, nekasapita tuinanka chicham antukmaunka Yuuska emegkaattsuk nu nukap nekamtikantaiti. Antsu shuar chicham pegker etsermaun antukaruitiat, uminachunka emegkaatkantaiti”. ²⁵Nukap aramunka Yuuscha nu nukap susatnaiti. Antsu ishichik aramuka ashi atantra inaiyam atinaiti, tusa tinaiti.

**Araka nere tsapamu
pachisa jintinkartuamu**

²⁶Jesús junasha chichaak: “Yuusa inamtairiya nuka shuar arakan arakmaujai meteketi. ²⁷Arakan árak ikuak pachitsuk kaninaiti, tuma tsawaar nui kintamar, araka jigkai araamuka pugkai tsakauwaiti. ²⁸Nugka nigki tsapamtikmau asa nuka tumauwaiti. Yama nagkamchakka kagkajiya tsapauwaiti. Tumamtai wachiri jinnaiti. Wachiri takiarmatai payagkrinak nui jigkairinaiti. ²⁹Jigkai katsuar tsamakmatai, tsawan juumain jeaamtaijuwaiti”.

**Jesús mostaza jigkain
pachis jintinkartuamu**
(Mt 13.31-35; Lc 13.18-19)

³⁰Junasha Jesús jintinkartak: “¿Atumnasha Yuus inammaurincha

warijai apatkana Yuuska tu inamui tusancha ujamainaitjarne? ³¹Yuus inammauka mostaza jigkai nugka aratia numamtinaiti. Ashi nugkanmaya araka jigkai aina nuiya ima shikapchichika mostaza jigkaiya nuwaiti. ³²Tumauwaitiat tsakak uun kanaknarin tsakauwaiti. Tumamtai chigki nanamainaksha nuna wakentin mikintunam ayamainawai. Numamtuk Yuuscha ishichik shuarnum inaman nagkama nukap amajeawai”, tusa tinaiti.

³³Nuna tusa Jesúska chikichan pachis ju aina jumamtinjai nita antumainan nukap jintinkartu jakuiti. ³⁴Aujmatmaun pachis tutsukka jintinkartu jakchauwaiti. Turasha ni unuinatairi ainan nuna takun tajai tusa ashi uja jakuiti.

**Jesús nase senchi
nasentun imijkamu**
(Mt 8.23-27; Lc 8.22-25)

³⁵Nu tsawantaik kintammaunam, ni unuinatairi ainan chicharuk: “Kucha amain wearmi”, tusa tinaiti.

³⁶Tusa takai Jesúska jukiar, amain wenak chikich ainanka ajapa iku-kiaru. Jesús amain ni unuinatairi ainajai weakai, shuar aina chikich botenmasha nemarkaruiti.

³⁷Tuma wenai, nase senchi nasentuk kuchancha imanik tsukatmamtikuk, botenam etsan senchi yara. ³⁸Turasha Jesúska bote sukiin jaanchin atamruk kanar egkemtatmaun ishintainak: “¿Jintinkartina! ¿Ameka ii wayaj nuka pachikrattsumek?” tusar tuina.

³⁹Tusa tuinakai nantaki nasen kuchajai chicharuk: “¿Mijaakta!” tusa tinaiti.

Nu tutai nasegka kuchajai ashi mijaakuiti. ⁴⁰Nuna tura ni unuinatairi ainan chicharuk:

“¿Urukakrumea imanikrumsha ashamarme? ¿Atumka winaka nekasapita turuttsurmek?” tusa tinaiti.

⁴¹Nu tama antukar nuiya sapijmarkar, nitak chichainak:

“¿Ju shuarsha uruku asamtaiya, nasesha, tura nayantsasha ni chichamurincha umirainawa? tusar nitak”, tunaiyaina.

**Jesús shuaran iwanch
chumpimtuamun utsankamu**

(Mt 8.28-34; Lc 8.26-39)

5 ¹Jesús ni unuinatairi ainajai kucha Galilea tutai amain nugka Gadaranam katigkaru. ²Nui anumak kanunmaya jinai, shuar iwanch chumpimtuamu jakau ikutainmaya taruntu. ³Nu shuarka jakau ikutainam puju, cadenajai jigkaar emetatajkama tujinkamu. ⁴Cadenajai uwejnnum, tura nawenam jigkarmasha imatiksag tsuriakai ashi tujinkamu. Tuma asa pegkesha emetmainchau jas weká. ⁵Tuma asa tsawaisha, káshisha jakau ikutainam, tura nainnumsha wekaas, tuke shinu weká, kayajaisha ijuuma weká. ⁶Imani wekainaitiat Jesúsan wainak tsekenki jeari, ni emtin tikishmatar, ⁷senchi untsukum:

“Jesúsa, Yuus ashi nagkakartakua nuna uchiriya, ¡Yuus antai tajame, wait aneasam waitkarsaipa!” tusa tinaiti.

⁸Nigka nunaka Jesús chicharuk: “Iwanchi, jiinki weakum nu shuarka agkan ikukta”, tamau asa tinaiti.

⁹Nuna takai Jesús chicharuk:

“¿Amina naarmesha yaita?” tusa iniam, ni ayak:

“Ika untsuri asar, ina naarigka Untsuriyaiti”, tusa tinaiti. ¹⁰Iwanch ainaka Jesúsan senchi seainak:

“Wait aneasam, jiiokratkumsha, yaja chikich nugkanmagka ishikratsuk, ii pujaj juig inaikartusta”, tusar tuina. ¹¹Tusa nui tijuch nainnum kuchi untsuri yutairin yuinak irunu asamtai, ¹²iwanch aina chichainak:

“Ju shuarnumia jiiokratkumnaka, au kuchi iruna ai utsaanatji”, tusar seaina.

¹³Tusa tama Jesúscha:

“Ayu, wetaarma”, tusa tinaiti. Nu tusa tima, shuarnaka ikuinak, dos mil kuchi irununam utsaanawaru. Tura iwanch utsantuam, kuchisha pizarar metsagkrukmaunam utsaana kuchanam iiyagkar ashi jinaawaru.

¹⁴Tumawarmatai kuchi kuitamin shuar yaaktanam matsatun, jeashat matsamin ainancha: kuchi tuma jinayi tusar ujakartasa shiakaruiti.

¹⁵Tumawar Jesús pujamunam kaunkama, iwanch chumpimtuamu asa, yaunchukka aya wekain jaanchin nugkur, shir enentaimkau jas Jesúsai ayaamas eketun wainkar senchi ashankaru. ¹⁶Tura nuna wainkaru aina iwanch chumpimtuamu pegker jas ekeemmayi, tura kuchisha jinaawarmai, tusar chikich ainancha ashi ujakaru. ¹⁷Nuna antukar Jesúsan jeariar chicharainak:

“Wait aneasam, chikich nugkanam wetá”, tusar tuina.

¹⁸Tusa tama Jesús weak botenam egkemkai, iwanch chumpimtuamu pegker amajsamusha chichaak: “Wisha Ame weam nui winitjai”, tusa tinaiti. ¹⁹Turasha Jesús chicharuk:

“Yuus amina wait anentramra nu pachisam, pujutairmin waketkim pataim aina ujakarta”, tusa tinaiti.

²⁰Nu tima waketki, Decápolisa yaaktarin Jesús ni pegker amaj-samun pachis etsertan nagkama. Tumakai ashi shuar nuna antukar enentai jearcharu.

**Jesús apu Jairo nawantrin
chikich nuwajai
pegker amajсармау
(Mt 9.18-26; Lc 8.40-56)**

²¹Jesús ni unuinatairi ainajai botenam chumpimar, kucha Galilea amain katigkarmatai, nukap shuar iiyaku tuarkaram, kucha tsukintrinig pujusaru. ²²Nui pujai judío iruuntai jea apuri, Jairo naartin, tajkama Jesúsán wainak, jeari tikishmatar, ²³senchi aujeak: “Wina nawantur pegke mayai ishinki tepaun ikukjai. Wina jearuisha wemi. Wait aneasam, ame ai tame wina nawantrusha uwejmijai antintrukta, turam nisha pegker jatrusti”, tusa tinaiti.

²⁴Nu tama Jesús Jairojai wuwaiti. Tumakai chikich ainasha nukap shimuina asar, Jesúsánaka chanuina.

²⁵⁻²⁶Nui chikichik nuwa nantu wainuk tsuakratin ainanam doce uwí wekaas, tsuwamak ashi ninu ainanka ashimak senchi waitaksha, pegker jaschau ayatik nu senchi ja wekain pachitkau. ²⁷Tuma asa Jesúsán pachis chichainamun antuk, shuar irununmag eteemki, Jesúsá jaanchri tsakarín antigku. ²⁸Ni enentaimas, “wika Jesúsá jaanchrinkisha antinkanka pegker jamainapitja, tu enentaimu”. ²⁹Tau asa nuna antia-muik numpa puwamunka nagkanak, ashi ni iyashi jamunka pegker jasu.

³⁰Nu tumantai, Jesúscha ni antigka pegker jasmaun nekapmar, shuar ukunam wininan ayanmata chichaak:

“¿Ya wina nugkutairuisha antinka?” tusa tinaiti.

³¹Nuna takai ni unuinatairi aina chicharainak:

“Shuar aina chanunmaina nuka wainchau asamek ¿wina nugkutairuisha ya antinkayi tusamsha tame?” tusa tuina.

³²Nu tamasha Jesúska yáki antinka tusa wainkattsa, ukurin ayanmata ashi iiya. ³³Tumakai nuwa nuna nugkutairin antig pegker jasuka, senchi ashamak kurakmai-kia Jesúsán jeari tikishmatar, waitrustuk chichaak: Wii antigmajme tusa uja. ³⁴Nu tusa ujam chicharuk:

“Nawanta, ameka ayatik antia-muikiapi pegker jastatja tu enentaimu asam, pegker jasume. Tuma asam shir aneasam wetá. Yamai nagkamsamka jatsuk pujustatme”, tusa tinaiti.

³⁵Nuna tusa chichaa wajai, judío iruuntai jea apuri jeen matsamin tariar, Jairon chichaman ujinak:

“Amina nawantrumka yamaika jakamai. Jintinkartinka aantram waitka wekaatsuk ikukta”, tusa tuina.

³⁶Nuna tuinakaisa Jesúska pachitsuk inaiyak, nawantrinnun chicharuk:

“Kuntuts enentaimipa, antsu wina nekasapita turutta”, tusa tinaiti.

³⁷Nuna tusa shuar ainanka ikuak, Pedron, Jacobon, Juankan Jacobo yachiya nujaig juki wuwaiti. ³⁸Tuma apu jeen jeak, nukap shuar senchi pampainai, úttancha imanik útu matsatun wainkauwaiti. ³⁹Imatu amaunam jea wayak:

“¿Urukamtai ima pampainarme? Imanikrumka útirpa, nuwachika jakachai, ayatik kanar tepawai”, tusa tinaiti.

⁴⁰Nuna takai chikich ainaka Jesúsán wishikraruiti. Turasha ashi nui matsatainanka aa jiir, nuwach jakaun nukuri nuna aparijai juki, nuiyasha ni unuinatairi ainan yaruak, nitajai nuwa jaka tepa-munam utsaana. ⁴¹Tuma uwejnium achik chichaak:

“¡Talita cum!” tinaiti. (“Nunaka nuwachi amina tajame nantakta”, taku tinaiti.)

⁴²Nu tusa tamauwaik nuwa, doce uwí aramu jakausha nantakug weká. Nuna tumamtai shuar ainaka enentai jearcharu. ⁴³Turasha Jesús: “Chikichik shuarkesha ujakairpa tusa akattrau, tura yutai susatarma yuati”, tusa tinaiti.

Jesús Nazaretnum pujusmau

(Mt 13.53-58; Lc 4.16-30)

6 ¹Jesús apu Jairo jeenia jiinki, Nazaretnum ni nugkeen waketai, ni unuinatairi ainasha Jesúsjai shiakaru. ²Tuma ayamtai tsawan tsawaru ai, Jesús judío aina iruuntai jeanam Yuusa chichamen etserkattsa waya. Tuma etserkai, nukap shuar ni etsermaun antukar enentai jearchar chichainak:

“¿Ju imatiksa jintinkartuatnuncha tuiyanak unuimaru? ¿Tuiyana unuimaru asampa wainchatai ainancha iwainawa? ³Ju shuar tablan takau, Maríán uchiri, Santiagon, Josén, Judasan, Simónkan yachiya jama, juna umaisha jui ijai pujuina jama”, tusa tuina. Nuna tuina asar, iturchat enentaimaina asar,

Jesúsán nekasapita tumain nekapenachu. ⁴Tumainakai Jesús chichaak:

“Yuusa chichamen etserna nunaka ashi shuar ainaka shir anentas anturin ainawai, antsu ni patai ni pujutairiya nuiyagka anturchau ainawai”, tusa tinaiti.

⁵Nuna tusa nuigka wainchatai ainanka iwainatsuk, ujumchik shuar ja ainan aya achikag pegker amarsau. ⁶Nita nekasapita ticharu asarmatai, enentai jearchauwaiti. Nuna tuma nu nugkanmag tiju yaakat iruunmaunam jintinkartu weká.

Jesús ni unuinatairi ainan chicharkartukarti tusa ishiakmau

(Mt 10.5-15; Lc 9.1-6)

⁷Jesús nina unuinatairi doce ainan etegkar untsuk irumar chicharuk: Yujasrum chicham etserkatarma, tusa jimar jimaran apatak ishimuk, iwanch aina jiirtinnasha senchimitikauwaiti. ⁸Tura asa:

“Jinta wesa atsumainka jutsuk, ima ushukrutaig jukitarma. Tura wampatcha, pansha, kuitcha jukirpa. ⁹Antsu zapatoka jukitarma, nugkutaisha jimarka jutsuk chikichik jukitarma”, tusa tinaiti. ¹⁰Atum yujasrum yama nagkamchakrum chikichik jeanmag jeaakrumka nuig pujusrum, chikich yaaktanam weakrum ikuktarma. ¹¹Antsu chikichik yaaktanam jearmin atumin nakitramainak, atum chicham etsermauncha nakitainakaigka, jiinkirum ikuakrum, atumi naween tsetse irunu peatrarum nita wainai akaketkarum ikuktarma. Nuka atumka ika chichamka ujamaitatrum atum nakitrau asaakrumin,

Yuus waittan suramsatnaitrume takurum turatarma, tusa tinaiti.

¹²Nuna timatai shiakar yujas shuar ainan chicharainak: Pujutrum yapajiatarma tusar tuina. ¹³Tura iwanch shuaran egkemtua ainancha jiirar ishimainak, ja ainancha muuknum aceitejai yakarar pegker amajaina.

Juan imakratin maamu

(Mt 14.1-12; Lc 9.7-9)

¹⁴Ashi chikich nugkanmaya ainajai, Jesúsán pachisar chichaina. Tumaina asarmatai, apu Herodes chichaak: “Juan imakratin mantam-nawa nu senchirtin jas, nantakin asa wainchatai ainancha iwainawai”, tusa tinaiti. ¹⁵Herodes nuna takai, chikich chichainak: “Nuka Elías” yaunchuk “Yuusa chichamen etserujakua nu nantaki wekawai tuina. Tura chikich chichainak: Nuka yaunchuk Yuusa chichamen etseru jakarua numamtinaiti” tusar tuina. ¹⁶Tuinakai Herodes antuk chichaak:

“Chichaman etsera nuka Juan-kaiti. Wii muuke tsupirkatarma tima, muuken tsupirak maawarmia nu nantaki tu wekawai”, tusa tinaiti.

¹⁷Nunaka nigki Juan maatarma timaunam Juankan maawaru asarmatai tinaiti. Yaunchuk Herodes ni yachi Felipe nuwen Herodías naartinan juruki nuatak pujakai, ¹⁸Juan chicharuk: “Apu, amina yatsumi nuwe jurukmeka nuatkam pujumaitsume”, tusa tutai, ¹⁹Herodías antuk kajek Juankan maattsa wakerayat, ²⁰Herodes: Juanka Yuusnumian chichaawai tusa ashamak, ni chichame wakerus antayat, nuna takumpapi

tawa tusagka nekachuiti. Tuma asa ayatik cadenajai jigkar cárcelnum egkea inaisauwaiti.

²¹Tura asantai Herodías Juankan yamaikiash maawaintaj tu enentaima pujai, Herodes ni akinamuri tsawarmatai jiistamuk, apu nijai takau ainan, suntara apuri ainancha, Galilean-maya apu ainajai ipa iruunar, yutai umikmaun yuinak eketaimamunam, ²²Herodíasan nawantri nui wayaa jantsemkai, Herodes nuna wainak senchi wakerukuiti. Tura irar ainasha imatik-sag wakerukaruiti. Tumawaru asarmatai Herodes nuwan chicharuk:

“Ame wari wakeram nu seatkumnaka, imatixsanak amastajme. ²³Ju nugkanam pujusan inamaj jukesha seatkumnaka, jimapetuk akanak amastajme”, tusa tinaiti.

²⁴Tusa tama jiinki we, nukurin jeari chicharuk:

“¿Warinak seatja? tusa tinaiti. Tusa tama Juan imakratna nuna muuke seata”, tusa tinaiti.

²⁵Tusa tama nuwaka wári waket-tsag wayaa chichaak:

“Wári Juan imakratna nuna muuke tsupikam, platonam egkeram surusta”, tusa tinaiti.

²⁶Tusa tama apu Herodes wake mesemar nekapeayat, ashi ame wakeramu seatmaunka imatixsanak amastajme tau asa, ni ipaamurisha nu tusa anajmatmaurinka antukaru asarmatai, yapajimainchau neka-peak, ²⁷wárimas chikichik suntaran chicharuk: Weme Juankan muuke tsupikam, platonam egkeram itaata tusa akupkau. ²⁸Tama cárcelnum Juan pujau asantai, weri muuken tsupik platonam egker itaamtai, Herodes nuwan susau. Turam nuwa juki ni nukurin susauwaiti.

²⁹Nu turamun Juankan unuinatairi aina antukar taruawar, iyashi jukiari ikusaru.

**Jesús cinco mil
shuaran ayuramu**

(Mt 14.13-21; Lc 9.10-17; Jn 6.1-15)

³⁰Juankan turawaru ai, Jesúsan unuinatairi aina Jesúsjai iruuntrar, nita takasmauri ainan tura jintinkar-tuamuri ainancha Jesúsan ujaina.

³¹Shuar nuik kautkaruka waketai, aya kautam yurumkasha yumainchau amajmau asa, Jesús nitan chicharuk:

“Wearmi tumar agkan ik kana-kiara ishichik ayamrarmi”, tusa tinaiti. ³²Turamu asa ni unuinatairinka yaruak botenam chumpimar nugka agkantunam wearu.

³³Tuma Jesús weamun yaaktan-maya shuar ainasha wainkar, shimui shimuinakua, Jesús anumkatnunam, utsaanawar iruuntrar. ³⁴Jesúscha anumak botenmaya jiinkama nukap shuar tuak iruuntatmaun wainak, oveja nitak kuitamsacham yujauwa numamtukeapi ja yujainawa tusa wait anentrau. Tura asa Yuusa chichamen nukap jintintawaiti. ³⁵Kia asamtai, ni unuinatairi aina jeariar chicharainak: “Etsa kiawai, juigka ika chikichik shuarkesha pujachmaunam kaunkaji. ³⁶Tuma asamtai shuarka iishiakta, yaaktanam jeat-tak jea matsata ai jeaawar nita yuat-nun sumakarti”, tusa tuina.

³⁷Tuinakai Jesús nitan ayak: “Atum nita yuatnuka susatarma”, tusa tinaiti.

Tama nita aimainak:

“¿Ii ainatik ai shiakar, jui nita yuawartin doscientos tsawan takasar jumainjai pan sumakar itamainait?” tusa tuina.

³⁸Nuna tusa tuinakai, Jesús nitan chicharuk:

“¿Urutma panka takakrume? Nu iistarma”, tusa tinaiti.

“Tutai shiakar pan cinco, jimar-chik namakjai aun iisar ikuinak, Jesúsan jeariar chichainak: Cinco pan awai, tura namakka jimarchik awai”, tusa ujaina.

³⁹Nu tusa ujakam:

“Shuar aina yaruakrum chirichiri iruna nui akantrarum shir matsas-taarma”, tusa tinaiti.

⁴⁰Jesús tusa takai shuaran cien, cien irumar matsaina, tura cincuenta, cincuenta irumrasha matsaina. ⁴¹Jesús cinco pankan jimar namakjai juki wajas, nayaim-pinmani pagkai Yuusan maaketi tusa, pankan puur, ni unuinatairi ainan shuar tinamkatarma tusa susau. Jimarchik namakan nunasha turusag puur ashi shuaran tinamkatarma tusa susau, turam shuar ainan tinamkaru. ⁴²Tura tinamkaram shuar ainasha ashi yuawar ejémakaru. ⁴³Tura pan namakjai ampintrauncha doce chagkinnum aimkaruiti. ⁴⁴Nunaka cinco mil shuar aina yuawaru ainawai.

**Jesús entsanam
wekaasa wemau**

(Mt 14.22-27; Jn 6.16-21)

⁴⁵Nuna ashi umikarmatai wárimas ni unuinatairi ainanka:

“Botenam chumpir, kucha amain Betsaidanam katigtarma.

Tusa ishimuk, nigka shuar ainan aujas ikuktasa juaku. ⁴⁶Tura shuaran aujas ikuak aparin aujsattsata, nigki nainnum wakau. ⁴⁷Tura kin-tamramtai, Jesús nigki kukar wajas, boteka kuchanam ajapean wean,

⁴⁸nase senchi nasentuk umpui aya awakeam, nasen nepetkiartasa senchi wiantainak waitainan wainkau. Tuke ima imaninakua tsawastatuk jai, nisha entsanam wekaas: Ayam-san tutupnik nagkamaktajai tusa wea. ⁴⁹Tumattamaun wainkar chichainak: Wakaniapi winawa, tusar ashamainak unsumaina. ⁵⁰Ashi metek wainkaru asar ashamainam Jesús chichaak:

Wiyaitjai, ashamrukairpa”, tusa tinaiti. ⁵¹Tusa botenam egkemramtai nasesha megkakau. Nu tumamtai wainkar enentai jearcharu. ⁵²Nunaka Jesús pankan namakjai puur ikaugka ajamamuncha shir enentaimtur iischaru asar tumawaruiti.

**Jesús Genesaretnumia
ja ainan pegker amajsamu**

(Mt 14.34-36)

⁵³Kucha amain Genesaretnum jeaawar, boten jigkaawar aepenak, ⁵⁴botenmaya jinainaig Jesúsán wainkar, ⁵⁵ashi nu yaaktanmayan shimutkar, ja ainanka tepetairin patainiar, Jesús pujamunam ikaataina. ⁵⁶Nita yama wayaamunmag yaakat shikapchichinam matsamnusha, yaakat uun ainanmayasha, jan yaruakar ikaatak jintanam matsasaru. Turawarmau asar Jesúsán chicharainak: Wait anenkarturta, amina nugkutairmin tsakarigsha antigka pegker jastasa wakeruinaji tusar tuina. Tura nuna antinaka pegker jasaru.

**Jesús shuaran tunau amaju
pachisa etserkamu**

(Mt 15.1-20)

7 ¹Fariseo aina tura chicham umiktinan jintinkartin aina Jerusalénnumia kaunkaujai Jesúsán

jeariaru. ²Tumakma tuke ikijmatai atii tusa timaun, Jesúsá unuinatairi aina umitsuk yuinan wainkaru. Turawar ikijmatsuk yuinawai tusar aujmataina. ³Fariseo ainaka, ashi judío ainajai nita uuntri, yurumak yutsuk shir ikijmara nui yutaiya tusa tu unuinarmau asar, ina uuntri turammauwa nuka sakatmatsuk, yamaiya juisha tuke turunati tuina asar nunaka tuina. ⁴Nitanka yutai surutainam wutiram jea taakrumsha, tuke ikijmasrumke ataarma timaunka, tuke umirsarke au ainawai. Nita umitairi ainaka ju nukapeti. Shikika umutai tsapa ainan, umutai yara ekentaincha, yurumak inartaincha, yutai chumpia ekentai jiru najanamuncha, peakri ainancha, ashi tuke shir nijasarke ajaku ainawai. ⁵Nitaka imatikaina asar, fariseo aina chicham umiktinan jintinkartin ainajai Jesúsán jeariar ininak:

“¿Urukamtai amina unuinatairam ainasha, yaunchuk ina uuntri aina umijakmauwa nuna metek umitskesha, nitasha ikijmatskesha yuinawa?” tusar tuina.

⁶Tusa tama ni aimuk:

“Yuusa chichamen etserin Isaías atum tsanumin ainatirmin pachis juna aak:

‘Ju shuar aina juka winaka ayatik nita chichamenig emematurinawai,
turasha winaka enentaimturainatsui.

⁷Tumaina asar aantar wina pachittsar emematjai tusa turutainawai, nita jintinkartuina nunasha, chikich aina ju umiktarma tusa tu jakarua nunak jintinkartuinawai’.

⁸Atumka chicham umiktarma Yuus timauwa nuka umirtsuk inaiyakrum, atum timaurmek umiarme.

⁹Tuma matsatu asarum, chicham umiktarma Yuus turammauwa nuka imanchauch amajsa inaiyakrum, atumi uuntri timauwa nuke umiarme. ¹⁰Moisés chichaak: ‘Atumi apari, tura atumi nukurisha chichame umirkatarma. Nina aparin, tura ni nukurincha pegkerchau chicharuka, aya mantamnati’, tusa tinaiti. ¹¹Turasha atum chichakrum: ‘Shuarka ni aparinka, ni nukurinkisha: Wika yaimaitsujume, ashi wina aruta juka Yuus anajmatamu asa, “Corbánkaiti”, tusa tumainaiti tarume’. (Corbán ta nuka warí ashi ima Yuusnau atii timau taku tawai.) ¹²Nu atum tarum nuka wika aparnaka nukurjai yaimaitsujai takurum tarume. ¹³Nu tuma asarum, chicham umiktarma Yuus timauwa nuka imanchau amajсарum inaiyakrum, atumin uuntri umitairi aina nuke umiarme, tura numamtuk chikich aina nusha takaarme”.

¹⁴Nuna tina shuar ainan untsuk, Jesús ataksha chichaak:

“Shir enentaimсарum anturtuktarma. ¹⁵Ashi yutai aina yuamua nuka shuarnaka ishichkisha tunauka amajmaitisui. Antsu shuaran tunau amaja nuka enentainmaya jina nuwaiti.

¹⁶Atum antutairi aramutirmeka shir antuktarma”, tusa tinaiti.

¹⁷Nuna tusa chikich ainanka ikuki jea wayaamtai, ni unuinatairi aina jeariar: ¿Ame yamai tame nusha wari takumea tame? tusar inina. ¹⁸⁻¹⁹Nu tusa iniam Jesús nitan chicharuk:

“¿Atumsha chikich shir antuinatsu antsarmekek shir antatsrum? ¿Ashi yutai aina nuka enentainmagka waitsuk ampujnumag egkema, iyashnumia jiinu asa, shuarnaka tunau amajtsu nuka nekatsrumek?” tusa tinaiti.

Yutai aina nuka ashi pegker ainawai taku tinaiti.

²⁰“Nuna tusa tina chichaak: Shuaran tunau amajuka enentainmaya jina nuwaiti. ²¹Shuaran enentainya jina nuka ju ainawai: Pegkerchau enentaimat, nuwa wakerut, kasamat, magkartut, ²²nuwa nuatkamu takat, chikichnau aina wakerut, tunau aina nuke takastasa wakerut, anagkartut, nampektasa wakerut, chikichnau wakeraku kakerkartut, chikich aina tsanumrut, ememat, shir enentaimas pujuchu. ²³Juka enentaimtainmaya ashi jinaina asar, shuarnaka tunau amajainawai”, tusa tinaiti.

Chikich nugkanmaya nuwa nekasapita timau

(Mt 15.21-28)

²⁴Nuiya jiinki yaakat Tiro Sidónjai jeantatak a nui wuwaiti. Tuma uumkataj tau asa jeanam waya, tura-sha ummainchau nekapea. ²⁵⁻²⁶Nu jeanam Jesús pujai, chikich nugkanmaya, Sirofenicianmaya nuwa nawantri iwanch egkemturmau Jesúsari tari tikishmatar chicharuk:

“Wina nawantrun iwanch egkemtua nu jiirturkita”, tusa tinaiti.

²⁷Tusa tama Jesús ayak:

“Yama nagkamchakka Israel shuar ainan uchiriya yuawarti, uchi pankan yuina atankir, yawa suamuka pegkerchauwaiti”, tusa tinaiti.

²⁸Nu tama nuwa ayak:

“Ee, nuka nekasa tame, Apuru, turasha pegke yawaksha mesa wakenam wajasar, uchi pankan tsaik akakeamun yuwa jama”, tusa tinaiti.

²⁹Nuwa nuna tusa timatai Jesús ayak:

“Yajau nuka tatsume. Yamaika jeemin wemainaitme. Iwanch amina nawantrumin pujurma nuka yamaika jiinki ikukni”, tusa tinaiti.

³⁰Nu tusa tama nuwasha wakетки jeen jeaakma, nawantri iwanch egkentuamuka pegker jas peaknum eketun wainkauwaiti.

**Jesús shuar empekun
chichachun pegker amajsamu**

(Mt 15.29-31)

³¹Jesús Tiro nugkanam pujau jiinki, Sidónnum weak, Decápolis nugkanam yaakat irununam nuke nagkamaki kucha Galileanam jeawaiti. ³²Tumamta nuiya shuar empekun chichachu pujun itariar chichainak:

“Wait aneasam uwejmijai ju antin-trukta”, tusar tuina.

³³Tusar tuinakai Jesús nu shuaran akanak juki, ni uwejen kuishnum inua, usukijai inain antinkau.

³⁴Tura wajan nayaimpinmani iimas mayairuk chichaak: “Efata” tinaiti. Nunaka “shuara kuishin uranta” taku tinaiti.

³⁵Nuna timatai shuar empekusha kuishi uranin, tura inaisha nunisag pegker chichamain jasu. ³⁶Nuna tura shuar ainan akupeak:

“Chikichik shuarkesha ju pachisrumka ujakairpa”, tusa akatar akupkaru. Tura akupkarmaitiat nu nukap etseraru. ³⁷Nuna tusar etserainakai, nukap shuar iruunturar shir

enentaimsar iiyainak: “Ashi pegkeran takáwai, empekuncha pegker amajui, chichachuncha chichamti-kui”, tusar tuina.

**Jesús cuatro mil
shuaran ayuramu**

(Mt 15.32-39)

8¹Nu tsawantin nukap shuar iruuntrarur. Turasha yumaintri atsurainakai, Jesús ni unuinatairi ainan untuk ikaanak chicharuk:

²“Ju shuar ainaka yurumkan yutsuk tres tsawan wijai matsataina asarmatai, wait anentainajai. ³Wii yurumkan ayurtsuk nita jeen ishim-maka, jeashtanmaya kaunkaru asar, jeen jeatsuk pimpikiar jinumain ainawai”, tusa tinaiti.

⁴Tusa takai nina unuinatairi aina chichainak:

“Turasha shuar atsamunam matsa-tutisha, ¿tuiya sumakria shuar ainsa ayurmainaitji?” tuina. ⁵Tusa tui-nakai Jesús chichaak:

“¿Atumsha urutma panka takakrume?” tusa tinaiti.

“Takai: Ika ayatik siete pan takakji”, tusa tuina.

⁶Tuinakai: “Shuar ainan nugkanam pujustarma”, tusa tinaiti.

Tusa Jesús pankan juki, Aparin maaketi tusa aujas, puur ni unuinatairi ainan: Atum tinamkatarma tusa susaram, nita jukiar shuar ainan tinamkaruiti. ⁷Namaksha ishichik au asamtai, turusag Yuusan maaketi tina, nunasha tinamkatarma tusa takai shuar ainan tinamkaruiti. ⁸Turawaram ashi shuar metek yuawar shir aneasaruiti. Tumawarmatai pan, namakjai ampintraun siete chagkinnum aimkaruiti. ⁹Nuna yuawaruka cuatro

mil shuar tumain ajakaruiti. Iman ainan ashi ayurak nui atak wainimi tusa ikuknaiti.

Jesús an fariseo aina wainchatai chikichik iwainakta tusa timau

(Mt 16.1-4; Lc 12.54-56)

¹⁰Tura ikuki Jesús nina unuinatairi ainajai botenam chumpimar nugka Dalmanuta tutainam wearuiti. ¹¹Nui jeaamtai fariseo aina tawar, Jesúsjai chichatan nagkamawaru. Tumaina asar anagkawar nekapsartasa chicharainak:

“Nayaimpinmaya ii wainkachmau chikichik iwainakta”, tusar tuina.

¹²Tusa tuinakai Jesús mayairuk wajan chichaak:

“¿Urukamtai ii wainkachmau iwainakta tusarmesha seatrume? Nekasan tajarme, atumnaka chikichik iwainamunkesha iwaintukchat-tajrume”, tusa tinaiti. ¹³Tusa ikuak, ni unuinatairi ainajai kucha amain wetasa botenam chumpimraruiti.

Fariseo jintinkartutairigka pan pachimtai lewaduraya numamtinaiti timau

(Mt 16.5-12)

¹⁴Nui wenak nita yumaintrinka kajinmatkiar, chikichik pannak jukiaruiti. ¹⁵Jesús nitan chicharuk:

“Fariseo aina pan pachimtai, tura Herodesa pan pachimtaiiri aina nusha shir enentaimrarum iis-tarma”, tusa tinaiti.

¹⁶Nuna tusa takai nitak chichainak: “Ii pan jukichaj nui nunaka turamji”, tusar tuina. ¹⁷Nu tuinamun Jesús nekaa chichaak:

“¿Urukamtai aya yutainmagsha enentaimrume? ¿Atumka eke antachu asarmek, shir

enentaimsarmeksha iyaatsrum? ¿Urukamtai shir enentaimtsurme? ¹⁸¿Atumka, wainkurmesha nekatsrumek, tura antakrumsha unuimatsrumek? ¹⁹Wii cinco pankan jukin, cinco mil shuaran ayuramij nuisha, ¿urutma chagkinnuma aimkamiarme?”

Nu tusa tama nita chichainak: “Doce chagkinnum aimkamiari”, tusar tuina.

²⁰Nuna tuinakai:

“Wii siete pankan jukin, cuatro mil shuar ayuram, ¿ampintrausha urutma chagkinnuma aimkamiarme?”

Tutai nita aimainak: Siete chagkinnum aimkamiari”, tusa tuina.

²¹Nuna tusa tuinakai ni chichaak:

“¿Nu turamu wainkayatrumsha eke nekatsrumek?” tusa tinaiti.

Jesús Betsaidanmaya shuaran wainmachun pegker amajsamu

²²Nuna tusa wear Betsaidanam jeawaruiti. Nui jeawarmatai shuar wainmachun itariar chichainak: Uwejmijai ju antintrukta tusar tuina. ²³Turam uwejnium achik juki, ninak akanki usukin juruki jinum yakar, jiin epetak awajas chicharuk: “¿Ishichkisha wainmamek?” tusa inia. ²⁴Tusa iniam wainmachusha iimas chichaak:

“Shuar aina númia nunin wekainan wainjai”, tusa tinaiti. ²⁵Takai Jesús ataksha jiin epetkau, turam wainmachusha shir esetar iimas ashi shir paan wainmakuiti.

²⁶Tumamtai ni jeen akupeak:

“Yaaktanmagka wetsuk, amina wii pegker amajsajam nusha chikichik shuarkesha ujatsuk wetá”, tusa tinaiti.

**Pedro Jesús an ameka
Cristowaitme timau**

(Mt 16.13-20; Lc 9.18-21)

²⁷Jesús ni unuinatairi ainan yaruak, Cesareanam Filipos a nuna yaaktari aina nui wearu. Jinta wesa, ni unuinatairi ainan iniak:

“¿Shuar ainasha winasha wari turutainawa?” tusa tinaiti.

²⁸Nuna tusa Jesús inimkai, nita aimainak:

“Aminka Juan imakratin ajakua nuwaiti tusa turamainawai”. Tura chikich aina chichainak: “Elías” yaunchuk puju jaku nutsukaiitti turamainawai, tura chikich aina chichainak: “Auka yaunchuk Yuusa chichamen etserin jina aina nuiya chikichik nantaki wekawai”, tusa turamainawai tusa tuina.

²⁹Tusa tama nitan iniak:

“Turasha ¿atumsha winasha wari turutrumea?” tusa tinaiti.

Jesús nuna takai, Pedro ayak:

“Ameka Cristowaitme”, tusa tinaiti.

³⁰“Nuna timatai Jesús chichaak: Wina pachittsarmeka chikichik shuarkesha ujakairpa”, tusa tinaiti.

**Jesús ni mantamnatnuri
etserkamu**

(Mt 16.21-23; Lc 9.22)

³¹Jesús jintinkartutan nagkama chichaak:

“Wika shuarnum akina asan, judío apuri aina, sacerdote apuri ainasha, tura chicham umiktinan jintinkartin ainasha ashi nakitainaku senchi waitkasa maam atinaitjai. Turasha tres tsawan asan nantaktinaitjai”, tusa tinaiti. ³²Jesús nunaka paan iwainak takai, Pedro Jesús an akanki chicharuk:

“¿Urukamtai amesha tusha enentaimme?” tusa tinaiti. ³³Nu tusa tama Jesús ni unuinatairi ainan iis, Pedro Satanása numamtuk chichaa asamtai jiyak:

“¿Satanása, jui wijai wajatsuk wetá!, ameka Yuusjai metekka enentaimtsume, antsu shuar enentaimtai enentaimme”, tusa tinaiti.

**Jesús wina nemartuktaj
tautirmeka atum wakeramuka
inaisatarma timau**

(Mt 16.24-28; Lc 9.23-27)

³⁴Nuna tusa ni unuinatairi ainan, chikich shuar ainajai ashi irumar chicharuk:

“Wina nemartuktaj tautirmeka atum wakeramuka inaiyakrum nemartuktarma, tumakrum shuar aina mantamattsa wakerutmaina-kaisha, wii wakeramua nuka kashi kashinig takastarma. ³⁵Shuar wii wakeramun takainan maattsa wakeruinawai. Tuma asamtai shuar wii wakeramun takatan nakitainawai. Shuar tumau ainaka Yuusjai tuke pujuschartin ainawai. Turasha shuar wii wakeramun takau ainan maataj tamaun nekauwaitiat wii wakeramun takau ainaka, Yuusjai tuke pujusartin ainawai. ³⁶Shuar ashi nugkanmaya wari ainan ashi ninu amajeaksha, ni jakaigka ni waririya nuka wakaninka uwemtikrumaitsui, antsu ni waririya nuke waittanmagka umainaiti. ³⁷Shuar wakanin waittsai tusa uwemtikrattsa akikmamainka pegke atsawai. ³⁸Atum wina chichamur pachisa chichat natsantrau akurminka wisha turusnak wina aparun tsaaptinrijai, nayaimpinmaya shuar pegker ainajai winaknasha natsantratnaitjarne”, tusa tinaiti.

Jesús yapajinamu

(Mt 17.1-13; Lc 9.28-36)

9¹Nekasa tajarme: “Atum jui iruntrum juiyati-ram eke jatsuk pujakrumka, Yuus ninu ainanam uruk inamratnukit nu wainkatin ainarme”, tusa tinaiti. ²Seis tsawan pujus, Jesús Pedron, Jacobon ni yachi Juanjai juki, nita-jai iruunar nain wakarua, tuma nita emtin Jesús nina iimigka yapajina. ³Nina jaanchrigka wincha jasu. Ju nugka juuiya shuarkesha imatika puju amamainchau puju jasu. ⁴Iman jasun Elías Moisésjai Jesúsán taruawar aujainan nita wainkaruiti. ⁵Nuna Pedro wainak Jesúsán chicharuk:

“Jintinkartina, juigka yajau pujatsji, tres aak aakmakmi, chikichik aminu, chikich Moisésnau, tura chikichka Elíasnau atii”, tusa tinaiti.

⁶Nunaka nigka wakerumainan wainak shir enentaimtsuk tinaiti. ⁷Nuna tusa taig, yuragkim yakiya juarki nitanka amuwawaiti. Turam irunai Yuus yuragminmaya chichaak: “Wina uchir nekas anetairka juwaiti, nigki anturkatarma”, tusa tamaun antukaruaiti. ⁸Nuna taig iikma Jesús nigki wajattamaun wainkaruiti.

⁹Jesús ni unuinatairi ainajai nainnumia akak nitan chicharuk:

“Atum yamai wainkaurum nu pachisrumka, wii shuarnum akinaawaitaj nuna mantuawarmatai, nantatsaigka chikichik shuarke-scha ujakairpa”, tusa tinaiti. ¹⁰Nuna timatai nunak antukar chikichnaka ujatsuk inaisaru. Tumainayat nitak chichainak: ¿Mantuawarmatai jakau ayatan nantaktinaitjai ta nunasha

uruk takug tawa? tusar ininaina.

¹¹Tusar Jesúsán ininak:

“¿Urukamtai chicham umiktinan jintinkartin ainasha, Elías yama nagkamchakka taatnaiti tusasha tuinawa?”

¹²Nuna tusa tuinakai Jesús aimuk:

“Nunaka nekas tuinawai, Elías niya emak taa ashi umiktinaiti. ¿Chicham umiktin aarmausha shuar-num inamratnun pachischa waritu aarmauwaita aneaktsumek? Nui chichakka waittsatnaiti, tura nakitam atinaiti tu aarmauwaiti. ¹³Turasha wii nekasa tajarme: Elíaska tayi, tumamtai chicham aarmaunam ta nunaka imatiksag shuar aina wake-ruinamunka umirkarai”, tusa tinaiti.

Jesús uchin iwanch egkemtuumun jiirkimu

(Mt 17.14-21; Lc 9.37-43)

¹⁴Jesús ni unuinatairi tres jukimujai waketkinaiti. Tuma jeajkama chicham umiktinan jintinkartin ainajaimak nukap shuar iruuntrar, ni unuinatairi ainajai jianinan Jesús wainkauwaiti. ¹⁵Tuma irunu Jesúsán wainkar amikmawartasa tsekenkiar weruina. ¹⁶Tumainakai Jesús nu shuar ainan chicharuk: “¿Atumsha wari pachisrumea nita-jaisha jianiarme?” tusa inia.

¹⁷Nuna takai nu shuar irununmaya chikichik ayak:

“Jintinkartina, jui wina uchirun iwanch egkemtua chichachu amajtursamtai itaajai. ¹⁸Wina uchirua juna iwanch egkemtakka saun aapak, nain aesi, chichiptin amajmayi. Imatika asamtai amina unuinatairam ainan itarin chicharukun: Iwanch jiikrum ajaprakrum, uchi pegker amajtursatarma tusan

timajai. Turasha nitaka jiiiktajkama tujinkarmayi”, tusa tinaiti.

¹⁹Nu tusa tama Jesús chichaak:

“Nekaspapita turutchau ainata, ¿Wini enentaimtan unuimararti tusancha, urutma nukapea atumjai iruuntrancha pujumainaitja? Uchi jui itartitarma”, tusa tinaiti. ²⁰Takai uchin ejétiaru. Turai iwanch nu uchin pujurusha Jesúsán wainak, uchinka waurmamtikak nugka senchi ajiar, saun aapkau. ²¹Imatikakai Jesús uchin aparin chicharuk:

“¿Urutma tsawanta junasha imatika pujurnaita?” tusa inia.

Takai uchirtin ayak:

“Uchichinak tuke imatika pujurnaiti. ²²Iwanch auna aitkak jinumsha epeamnau amajnyai. Tura entsasha ajug maamnau amajnyai. Ame yaintrumainaitkumka, iwanch jilki akupeakum pegker amajtursata”, tusa tinaiti.

²³Nuna takai Jesús chicharuk:

“Yaintrumainaitkumka tusamka tiipa, shuar nekas Yuusapi turumainaita”, tusa taunka ashi turumainaiti.

²⁴Nu tusa tutai uchi aparisha senchi chichaak:

“Wika nunaka nekasapapita tajai. Tura wii imanisan nekasapapita tichamnau nekapeakaisha, ame yainkata wisha amini nekasapapita titajai”, tusa tinaiti.

²⁵Nukap shuar iruunkai wainak, Jesús iwanchin jiyak:

“Iwanch chichachu empeku wii yamai tajame. Jinkim weakum ju uchi ikuktá, tumamka atakka wake-trukmeka egkemtuawaipa”, tusa tinaiti.

²⁶Tusa tama iwancha senchi chichaak jinki weak, uchinka

waurmamtikak jakaujai metek iku-kin. Turamtai shuar aina uchika jakayi, tusa tuina.

²⁷Turasha Jesús uwejnium achika inankim uchisha wajasu.

²⁸Nuna tura Jesús shuar ainan ikuak jeanam waya. Nui wayaamtai ni unuinatairi aina akanki jukiar ininak:

“¿Urukamtaig isha iwanch jiiiktaj-kamarsha tujinkamji?” tusar tuina.

²⁹Nuna tusa tuinakai Jesús chichaak:

“Iwanchka, junisrik pujusrika jiiishtaiya, antsu yurumak yutsuk pujusa, Yuus aukkur jiiitia”, tusa tinaiti.

Jesús ni mantamnatnurin jimara etserkamu

(Mt 17.22-23; Lc 9.43-45)

³⁰Nuna tusa ikuak Galileanmani wearu. Nu weaksha Jesúska chikichik shuarkesha nekarawai tusa nakitu jakuuti. ³¹Tumak wekaas ni unuinatairi ainan chicharuk:

“Wii shuarnum akinawaitaj junaka achirkar surutkartatui. Turutawarmatai winaka mantuawartatui, turasha jakancha tres tsawan asan, ataksha nantaktinaitjai”, tusa tinaiti.

³²Nu tusa tamasha, nuna takumpapi tawa tusarka nekainachu. Tumainaksha arantuina asar iniascharuuti.

¿Yáki apusha atinaita? tusa inimsamu

(Mt 18.1-5; Lc 9.46-48)

³³Tumawar yaakat Capernaúmnum jeawar, Jesús ni unuinatairi ainan iniak: ¿Jinta winisrumsha wari chichamrimarme? tusa tinaiti.

³⁴Takaisha ¿ii ainaj juiyasha yáki apusha atinait? tusar jinta winisarsar tunainiaru asar, aimkacharuiti.

³⁵Tumawarmatai ni unuinatairi ainan ashi untsuk, ikaanak chicharuk: Shuar chikichan nagkakau, ni apumataj tauka, chikich ainan ashi umirin amainaiti, tusa tinaiti.

³⁶Nuna taku chikichik uchin juki achik wajas chichaak:

³⁷Shuar wina anentuka ju uchia juninchinkisha shir anentas juaka, winasha turusag jurawai. Turasha ima winakka juratsui, antsu wina Apar akuptukua nunasha juawai.

**Shuar ina kajertamchauka
ina yainmaji timaj**

(Mt 10.42; Lc 9.49-50)

³⁸Nuna tusa takai Juan chichaak: “Jintinkartina, shuar amina pachitmas shuaran iwanch egkemtuamu ainan iwanchin jiiru wainkamji. Tura wainkar ijai iruunar wekaichu asamtai chichaakur: Ameka aitkatsuk inaisata, timaji”, tusa tinaiti.

³⁹Nuna tusa takai Jesús ayak: “Shuar wina naarun pachis iwanchin jiyaaka inaisata tiirpa. Chikichik shuarkesha wina naarun pachis iwanchin jiiki akupeayat, winaka pegkerchauka chichartumaitisui.

⁴⁰Shuar ina kajertamchauka ina yainmaji. ⁴¹Atum wina nemartin ainatirmin chikichik shuarkesha entsan shikik umarta tusa, amasuka, nisha aantra suam atinaiti”, tusa tinaiti.

**Chikichan tunaun takaamtiku
ima senchi waittsartinaiti**

(Mt 18.6-9; Lc 17.1-2)

⁴²Uchi wina nemartuktasa enentaimturaina nuna tunaun

takamtikainaka, kaya uun jigkaar kuntejnum netua, nayantsa kunarin ajapeamua numamtuk artinaiti. ⁴³⁻⁴⁴Atumin uweje tunaun takamtikramkaigka, tsupikrum ajapawa numamtuk tunau takat inaisatarma. Chikichik uwejek nayaimpinam wayawa numamtuk, tuke pujutia nui tunaurtinchau wayamuka pegkeraiti. Antsu jima uwejtin akurmeka ji kajinchaunam, akasha jinichunam pujusrum waitmainaitrume. ⁴⁵⁻⁴⁶Tumamain asarum atumi nawegsha tunaun takamtikramkaigka, tsupikrum ajapawa numamtuk tunau takat inaisatarma. Chikichik nawek nayaimpinam shutus wayawa numamtuk, tuke pujutia nui tunaurtinchau wayaamuka pegkeraiti. Antsu jima nawentin akurmeka ji kajinchaunam, akasha jinichunam pujusrum waitmainaitrume. ⁴⁷⁻⁴⁸Tura atumin ji tunau takatnum enentaimtikramkaigka, nusha turusrumek chikichik jiimi ukuinkarum ajapawa numamtuk tunau takat inaisatarma. Chikichik jiijaig iimsa nayaimpinam wayawa numamtuk, Yuusa inamtairiya nui tunaurtinchau wayamuka pegkeraiti. Antsu jima jiintin akurmeka ji kajinchaunam akasha jinichunam pujusrum waitmainaitrume.

⁴⁹“Shuar yutain kaurai tusa weejai salamna numamtuk, Yuuscha pegkermamtikattsa ninu ainatincha nekapramas iirmastinaitji. ⁵⁰Weeka jea jeatnuri aramu asa pegkeraiti. Turasha jea jeatnuri megkakamtaigka, chikichik shuarkesha wakerumaitisui. Ataksha waketki, jea jeatu wemainchau asamtai, ayatik juki aa ajapeam amainaiti. Atum wina nemartautirmeka weea numamtin

ataarma. Tumau asarum chikich ainajaisha agkan shir anenaisrum pujustarma”, tusa Jesús tinaiti.

**Nuwa ajapeamu pachisa
jintinkartuamu**

(Mt 19.1-12; Lc 16.18)

10 ¹Jesús Capernaúmnumia jiinki, Judeanam jea entsa Jordán amaincha katigku. Tumam-tai nuyia shuar tuarkam, ni jintin-kartutairinka turusag jintinkartau.

²Nui jintinkartak wajattamaun, ujumchik fariseo aina ju iniasmi, warituk chichakat, tumamtai tsanumrurmi tusar jeariar ininak: ¿Uruk awa, shuarsha nuwencha ajapmainkait? tusar tuina. ³Nu tama Jesús nitan ayak:

“¿Moisés aarmausha waritua?” tusa tinaiti.

⁴Nu tama nita aimainak:

“Moiséska atum nuwem ajapattsarum wakerakrumka, nuwa ajapeakuum wakerakrumka, nuwa ajapeakuum aatai aarum, nuwa susarum ikuk-tarma tusa turamnaitji”, tusa tuina.

⁵Tuinakai Jesús nitan chicharuk:

“Moisés turatarma turamiarua nunaka atum iturchat enentaimkurmin turamiaruiti. ⁶Turasha yama nagkamchakka ‘Yuus aishmagkun nuwajai najanawaiti. ⁷Turamu asar shuar nuwenkugka, aparin nukurijai ikuak, ni nuwejaig pujumainaiti. ⁸Nu aishmag nuwajai apatnak chikichik iyashia numamtin jasartinaiti’. Nu timau asamtai shuar nuwenaka jimara tumauchauwaiti, antsu chikichkia numamtinaiti. ⁹Yuus aishmagkun nuwajai apatkauwaiti, turamu asa shuarka nuwejaigka ajapnaimain ainatsui, tusa tinaiti.

¹⁰Nuna tusa ikukmatai jea jeawar Jesúsua unuinatairi aina Jesúsán

ininak: ¿Nusha wari takumea timame?” tusar tuina.

¹¹Nu tusa iniam Jesús chichaak:

“Shuar nuwenawaitiat nuwen ajapa pujus, chikich nuwan nuat-kugka, tunaun takak tumawai.

¹²Tura nuwasha aishrin ikuki, chikich shuarjai aishrinkugka, tunaun takak tumawai, tusa Jesús”, tinaiti.

Jesúsán uchi ainan ikaatkamu

(Mt 19.13-15; Lc 18.15-17)

¹³Nuna ashi tina inagnai, Yuus pujut pegkernum yaintruksi, tusar shuar uchirtin aina uchirin ni antintruksi tusar ikaatkaru. Turuinakai Jesúsán unuinatairi aina shuar ainan chicharainak: ¿Urukamtai Jesúscha waitkarme? tusa tuina. ¹⁴Tuinakai Jesús wainak kajek chicharuk:

“Tutsuk inaisatarma. Atum tusarum nuig uchi awakearairpa. Uun ainasha ju uchi wina nekasapita turutaina jumamtuk, nekasapita turutaina-kaigka nitaincha Yuuska inamratsa wakerawai. ¹⁵Shuar Yuusa inamtairiya nui wayaattsa wakeruinaka uchi aina iturchat enentaimtsuk wina enentaimturaina imaniasag enentaimturmain ainawai”, tusa tinaiti.

¹⁶Nuna tusa Jesús uchin yaruak ninii irumar chiki chikichik uchin achiak:

“Yuus pujut pegkernum yainmakti”, tusa tinaiti.

**Shuar natsa wiakach
Jesúsjai chichasmau**

(Mt 19.16-26; Lc 18.18-27)

¹⁷Tina ikukmatai shuar natsa tse-kegki tari tikishmatar aujuk:

“Jintinkartina Pegkera, ¿wisha pujut nagkanchaun jukimij tusancha urukmainaitja?” tusa tinaiti.

¹⁸Nu tusa tama Jesús ayak:

“¿Urukantai winasha Pegkera turutme? Ima Yuusketi Pegkerka. ¹⁹¿Chicham umiktin aarmauwa nui chichaak: Atumi nuwenchuka takasairpa, magkartuawairpa, kasamkairpa, chikich shuarkesha chicham tsanumrurairpa, atumi apari tura atumi nukurisha umirkatarma, tusa ta nusha nekamek? tusa tinaiti. ²⁰Tama shuar natsa chichaak: Jintinkartina, ame tame nunaka wika uchiich asanak ashi umikuitjai”, tusa tinaiti.

²¹Takai Jesús wait anenmain iisu, tura chicharuk:

“Chikichik umimain arutramui. Ame jeemin wetá, tumam amina waríram arutrama nuka ashi surakum, kuitrinchau aina anramek tinamkam inaisata. Ame turamka nayaimpinam shir aneam pujustinatme. Tumatin asam wina nemartukta”, tusa tinaiti.

²²Tusa tama antuk nigka shir wiakach asa, wake mesek jiinki wuwaiti.

²³Tuma wematai Jesús nui irunun ayanmata iis, ni unuinatairi ainan chicharuk:

“Shuar wiakach aina Yuusa inamtairin wayaataj tamauka shir iturchataiti”, tusa tinaiti.

²⁴Nuna takai ni unuinatairi aina enentai jearcharu. Tumawarmatai Jesús awentsag chichaak:

“Uchir ainata, shuar Yuusa inamtairin wayaattsa wakerayat, ni warírin ima senchi enentaimtauka shir iturchataiti. ²⁵Auja waarin camello waig nagkamamainaiti. Turasha shuar wiakach aina nayaimpinam Yuusa inamtairinka yupichu waimain nekapenatsui”, tusa tinaiti.

²⁶Nuna takai ni unuinatairi ainaka enentai jearchar chichainak:

“Iturchata imau aisha ¿yáki uwemratnaita?” tusar ininaina.

²⁷Nuna tuinakai Jesús ni unuinatairi ainan iis chichaak:

“Shuar iismaka juka iturchataiti, turasha shuar tujintaku turumainchaunka Yuus ashi turumainaiti”, tusa tinaiti.



(Mr 10.25)

**Jesúsa namarin ainaka
nita ikukmaurin nagkasau
jukiartinaiti timau**

(Mt 19.27-30; Lc 18.28-30)

²⁸Nuna tusa takai Pedro ayak:
“Turasha ii ainatika ina warí
arutramainasha ashi ikuakur ame
nemarkamji”, tusa tinaiti.

²⁹Nuna takai Jesús ayak:
“Nekasa tajarme, shuar wina
nemartak chicham uwemtikartina
nuna etserkatsa, jeen, yachi ainan,
umai ainan, aparín, nukurin, uchiri
ainancha tura nugkejai ashi ikukin
ainaka, ³⁰yamai ju nugka jui puju-
sar, waitainaksha jee ainan, yachi
ainan, umai ainan, nukurin, uchiri
ainancha ashi nita nugke ainajai nita
ikukmaun inagkasar, cienka ima-
nia nukap jukiartinaiti. Antsu nugka
meser nagkantina nui, pujut nagkan-
chaun jukiartinaiti. ³¹Turasha yamai
shuar eme anentai aina nuka aantar
juakartinaiti, antsu yamaiya jui shuar
eme anentsarsha iishtai aina nu ima
senchi eme anentam artinaiti”.

**Jesús ni mantamnatnurin
tresas etserkamú**

(Mt 20.17-19; Lc 18.31-34)

³²Jesús ni unuinatairi ainajai Jeru-
salénnum wesa, ni emak wea. Tuma-
kai nina unuinatairi ainaka enentai
jearchamnau nekapena, tura chikich
ukunam shimauka ashamaína. Tuma-
nakai Jesús ni unuinatairi ainanka
ashi yaruak, winaka turutawartatui
tusa ujak: ³³“Yamai ju shimaj junisrik
Jerusalénnum weaji. Ai jeamunam
wii shuarunam akinawaitaj junaka
jurukiar, sacerdote apuri ainanam,
tura chicham umiktinan jintinkar-
tin ainanam ejétiar surutkartatui.

Turutawarmatai nita jurukiar, maa-
warti tusa judíochu ainanam surut-
kartatui. ³⁴Tura wishikruinak, awat-
tutnasha imanik awattuinak, usu-
kruinak waitkaras mantuawartatui.
Turasha tres tsawan tepesan, ataksha
nantaktatjai”, tusa tinaiti.

**Jacob Juanjai
Jesúsán seawarmau**

(Mt 20.20-28)

³⁵Nuna tusa timatai, Zebedeo
uchiri aina, Jacob, Juanjai Jesúsán
jeantar chicharainak:

“Jintinkartina, wait aneamam ii
seamtataj nuka, turusmek umikta”,
tusa tuina.

³⁶Nuna tusa tuinakai Jesús chichaak:
“¿Wari seattasrumea wakerarme?”
tusa tinaiti.

³⁷Nu tutai nita chichainak:

“Ame inamtairmin wakam ekeem-
sakmincha ii jimarti, chikich amina
untsurmini eketai, chikich amina
menarmini ekeemsar, ame etea
ekeemsartasa wakeraji”, tusa tuina.

³⁸Nuna tuinakai Jesús ayak:

“Atum wina seatrum nuka neka-
chiatrum seatrume. ¿Atumin neka-
pramainak waitkarmainakaisha, wii
waittsataj imanisrumkek waitmai-
naitrum? ¿Tura wii jakattaj imanis-
rumkek jamainaitrum?” tusa tinaiti.

³⁹Nu tusa tamasha chichainak:

“Ee, isha waitmainaitji”, tusa tuina.

Nuna tuinakai Jesús nitan chicha-
ruk:

“Wii waittsataj imanisrumkek wait-
taka waittsatnaitrume. ⁴⁰Turasha
wika ju wina untsuruini, tura chiki-
cha ju menaruini ekeemsati tusanka
tumaitsujrume. Antsu wina Apar
ya ekeemsati tusag umikuita nuke
ekeemsartin ainawai”, tusa tinaiti.

⁴¹Nu tusa tamaun Jesúsan unuinatairi chikich aina antukar Jacobon, Juanjai senchi kajerkaru. ⁴²Nuna tumainakai ashi untsuk irumar chicharuk:

“Atumka nekarme, ju nugka juiya apu ainaka, shuar ainan nitano amajak ina matsamin ainawai. Nuna turuinak chichamnasha aya apuk anturnain ainawai. ⁴³Turasha atum ainatirmeka nuka tumashtin ainarme. Atum apu atasrum wakerakrumka, chikich shuar umirin amainaitrume. ⁴⁴Tura chichame anturtai atasrum wakerakrumka, chikich inatai amainaitrume. ⁴⁵Wii shuarnum akinawaitaj nunaka shuar aina umirtukarti tusanka taachuitjai, antsu wika nita umirkun takarsattsan, nuna tumakun nita pujutincha uwemtikattsan tura nita ayamrakun wii mantamnattsan tawaitjai”, tusa tinaiti.

**Jesús Bartimeon
wainmachun pegker amajsamu**

(Mt 20.29-34; Lc 18.35-43)

⁴⁶Nuna tusa nui juakiar Jericónam jeawaru, nuiya shuar aina saatukam, Jesúscha nina unuinatairi ainajai iruunas weai, shuar wainmachu Bartimeo naartin, Timeo uchiri, junta yantamen tanta, shuar nagkamainakai, winasha antrarmek kuit surustarma tusa seama eketu. ⁴⁷Jesús Nazaretnumiaya nu jui tiiju winawai tamaun antuk, wainmachusha senchi untsumtan nagkama. Tumak:

“¡Jesúsa, David weantu uchiriya, winasha wait aneamam wait anentrurta!” tusa tinaiti.

⁴⁸Imatkai nui shuar irunu chichainak: Imattsuk takamtak wajasia tusar tuina. Nu tusa tamasha, nu senchi untsumuk:

“¡Jesúsa, David weantu uchiriya, winasha wait anentrurta!” tusa tinaiti.

⁴⁹Imatkai Jesúscha nui wajan chichaak:

“Jui tantati untsuktarma”, tusa tinaiti. Nuna takai:

“Pai, yamaika untsurmawai, arantsuk wajakim jui tantata”, tusa tuina.

⁵⁰Nu tama ni nugkuarmaunka awiik, nugka ajuan aepeak wajaki tsekegki Jesús wajamunam jeantu.

⁵¹Nui jeanmatai Jesús chicharuk:

“¿Winasha warinma wait anentrurti tusamea wakerutame?” tusa inia.

Tusa iniam wainmachu ayak:

“Jintinkartina, wika paan iimtikriti tusan wakerajai”, tusa tinaiti.

⁵²Nu tusa tama Jesús ayak:

“Ameka wina nekaspapita turutu asam, pegker jasume. Tuma asam yamaika wetá”, tusa tinaiti.

Nu tamauwaik, wainmachusha paan iimnaiti. Tuma Jesús weakai nisha nemarkauwaiti.

**Jesús yaakat
Jerusalénnum wayaamu**

(Mt 21.1-11; Lc 19.29-40; Jn 12.12-19)

11 ¹Jerusalénnum jeattak yaakat Betfagé Betaniajai Olivosa naintri iinias a nui jeaa, Jesús ni unuinatairi jimarán akupeak:

²“Au yaakat a ai wetaarma. Tumarum jeaarum burro entsamkachmau yama tsaka waitinam jigkaam wajau wainkattarme. Turarum atia jukirum itartitarma”, tusa tinaiti. ³Nu juarmin chikichik shuarkesha ¿urukamtai juarme? Tusa takaisha: Ina apuri atsuma asamtai juaji, turasha wári itattaji tusarum ikuktaarma, tusa tinaiti.

⁴Nu tusa tima, nitasha weriar iikma jinta yantamchirin waitinam tiju jigmaam wajattamaun wainkaratina.

⁵Turuinakai nui shuar irunu chichainak: ¿Burrosha urukamtai atiarme? tusa tuina.

⁶Nu tuinam nitasha, Jesús turamkurmincha titarma tusa timaunka imatiksag ujakaru. Turawaram pachitsuk inaisaru. ⁷Atia jukiar Jesús wajamunam ejénier, nita nugkutairin burro tuntupeen ain-kar shir umikarmatai, Jesús waka ekeemsauwaiti. ⁸Tuma weakai Jesús an eme anentas iiyainak shuar

nukap asar, nita nugkutairin awikar jintanam aitar umainai, chikich ainaka nukan tsupirar jintanam aitar umaina.^f ⁹Turuinakai shuar emak shimau, tura ukunam wininasha emematainak senchi chichainak:

“¡Yuus akupturmakmau winitrama juka shir aneasa emematiarmi!

¹⁰¡Apu David weantunam akinawa nu shir anentsarmi. Turakur Yuuscha emematiarmi!” amajaina.

¹¹Jesús imatrusam Jerusalénnum jea, Yuus ememattasa iruuntai jeanmasha waya. Tuma etsa pegke aka



(Mr 11.11)

^f 11.8 Nunaka ina apuri winawai, tusar eme anentas iiyainak emematainak turawaru ainawai.

asamtai, ni unuinatairi ainanka ashi yaruak Betanianam wuwaiti.

**Jesús númi higuera tutain
nerekchau asamtai ameka
nerekchatnaitme tusa timau**

(Mt 21.18-22)

¹²Tuma Betanianam kanar, tsa-warmatai jiinkiar weamunam Jesús tsukaruíti. ¹³Tuma wesa higuera n shir nukarak wajaun wainak: Nere atsuash tusa jeari iijaykama, nereti jeaachu asamtai, aya nukak jas atamaun wainak, ¹⁴chicharuk:

“Amina neremnaka chikichik shuarkesha pegke yuashtin ainawai”, tusa tinaiti.

Nuna tusa titatmaun ni unuinatairi ainasha antukaruíti.

**Yuus ememattasa iruuntai
jeanam shuar matsatun
Jesús jiira ishiakmau**

(Mt 21.12-17; Lc 19.45-48; Jn 2.13-22)

¹⁵Nuna timatai ikuinak Jerusalén-nun jea Yuus ememattasa iruuntai jeanam waikma, shuar tagku surin ainan, tura nuna sumau ainajaimak aa jiir kuitan yapajin aina mesarincha shitaki akakek, pauman surin ainan ekeemtairincha turusag akakekui. ¹⁶Tura chikichik shuarkesha jutika suruinakka, juigka wayaawaragka tusa tinaiti. ¹⁷Tura jintinkartak chichaak:

“Nina chichame aarmauwa nui Yuus chichaak:


“Wina jearka ashi nugkanmaya ainasha wina seatainak iruuntai atinaiti tawai’. Nu tu aarmau aig, atumka Yuus emematku epeatin tagku chikich aina tsanuarum suakrum kuit atumnaun atin jua asarum, shuar kasa matsamtaiya numamtuk amajsaurme”, tusa tinaiti.

¹⁸Nuna timatai sacerdote apuri aina, chicham umiktinan jintinkartan ainajai nuna antukar, Jesús uruk achikrik maawaj tusar chichamruina. Turuinayat ni jintinkartamun shuar aina wakerusar anturaina asarmatai, nuna ashamaina. ¹⁹Turasha etsa pegke akakai, Jesúska ni unuinatairi ainan ashi yaruak yaak-tanka ikuak wuwaiti.

**Númi higuera
kukaru wainkamu**

(Mt 21.20-22)

²⁰Nui kanarar káshikmasar nagkamakma higuera kagkapeejai ashi kukar wajattamaun wainkaruíti. ²¹Tuman Pedro wainak Jesús nu numin chicharuk: Ame neremnaka chikichik shuarkesha pegke yuachartin ainawai timaun anearuíti. Tuma chichaak:



(Mr 11.20)

“Jintinkartina, ame higuera nerek-chatnaitme tusam ikukmam nu kukar waja au iisiana”, tusa tinaiti.

²²Pedro tusa tama Jesús ayak:

“Yuusa nuke shir enentaimtus-tarma. ²³Ju nainta juna chikichik shuarkesha chicharuk: ‘¡Nainta, jui atsuk, nayantsanam wajata!’ tusa iturchat enentaimtsuk, nekas tumat-tawapi tusa tamaka tumamainaiti. Nunaka wika nekasa tajarme. ²⁴Nui atum Yuus aujkurmesha, Yuusapi nekas ashi turattawa tusarum, ishichkisha iturchat enentaimtsuk takurmeka jukittarme tusan tajarme. ²⁵Wina tunaur ainancha tsagkurturti tusarum Yuus sea-krumka, atumjai kajernaikamu akaisha tsagkuratarma. Nu tuma-krumnaka atumin apari nayaimpinam puja nusha seamka atumin tunaurcha tsagkurtamrattarme. ²⁶Turasha atum kajernaikamujai tsagkurnaiyachkurminka, atumi apari nayaimpinam puja nusha atumin tunauchi ainancha tsagkurtam-rashtin ainarme”, tusa tinaiti.

Jesúsya yana chichamenia shuarsha jiyame timau

(Mt 21.23-27; Lc 20.1-8)

²⁷Nuna tusa Jerusalénnum waketiariuiti. Nui jeawar Yuus ememattasa iruuntai jeanam Jesúsán pujaun wainkar, sacerdote apuri aina, chicham umiktinan jintinkartin aina, judío apuri ainajai iruunar jeariar, ²⁸ininak:

“¿Ya amincha shuar jjiira ishiakta tusa turamkaiya aitkame?” tusa tuina.

²⁹Nuna tuinakai Jesúscha chichaak: “Wisha atumin iniastajrume: ¿Ya Juan imakratnuncha akupkauwaita,

Yuusak akupkauwait, turachkusha shuar ainak akupkauwait? ³⁰Wina-sha nu ujatkatarma. Turutawakrumin yana chichamenia wisha jutikaja nunasha ujaktajrume”, tusa tinaiti.

³¹Nu tusa tama utujimkar, nitak chichainak: “¿Wari titajik? Juan-naka Yuus akupkauwaiti takurinchacha, ¿turasha urukamtai umirka-chuitrume?” turamtatji. ³²Tura shuar akupkauwaiti” takurinchacha, ju shuar aina Juana Yuusnumian chicharkartu jakuuti tuina asar, nita mantammam ainawai tunaina. ³³Nuna tusar utujimkar Jesúsán chicharainak:

“Yatsuk Juannasha akupkauwait nekatsji”, tusar tuina.

Nuna tuinakai Jesúscha chichaak: “Antsu wisha yana chichamenia aitkaja nunaka ujakchattajrume”, tusa tinaiti.

Ajanam takau pegkerchau aina pachisa jintinkartuamu

(Mt 21.33-46; Lc 20.9-18)

12 ¹Nuna tusa inaiyak, Jesús ataksha shuar ainan jintintiaik: “Chikichik shuar ajariin uvan arakmak umik, shir tanishrauwaiti. Uva juuka ijuraa yumiri jukitnurinchacha najanawaiti, tura yaki waka árak iistintrincha watain najanawaiti. Imatika ashi shir umik, chikich shuaran eak: Atum juka kuitamrutatarma tusa ikuak, nigka chikich nugkanam wuwaiti. ²Tuma pujus, uva juut jeaamtai, ni inatairin akatar akupeak: Ame weme jeaam uva winau amaina nu ajan kuitamin aina seata, tusa akupkauwaiti. ³Turam jeattamaun aja kuitamainak matsatu achikar awa awatainakua

pegke sutsuk awaigkiaruiti. ⁴Turawarmatai ajartin inatairin chikichan ataksha akupkau, turam ajanam jeattamaun, nunasha muuknum kayajai tukurar, apujkar tura pegkerchau chicharkar awaigkiaruiti.

⁵Nuna turawarmatai ajartinka chikichnasha inatairin akupkauwaiti. Turam ajanam jeattamaun nunaka maawaruuiti. Antsu nuna maawarmatai, ataksha shuaran nukap ishiakuiti. Turawaram ajanam jearmatai, ujumchik shuaran ayatik awattrar awake-nak, chikichnaka maawaruuiti. ⁶Nuna turawarmatai ima ni uchirig, ni anetairi juakuiti. Tuma asamtai junaka araantusartsuk iirtusarainta tusa akupkauwaiti. ⁷Tura akupkam nusha ajanam winittamaun ajan kuitamin aina wainkar chichainak: 'Auwaiti ju aja juna jukitnuka, nekas maa ajapar, juka inu amajsami', tusar tuina. ⁸Tusar chichaman umikaru asar, apu uchiri winittamaun achikar maawar, ajan ikumtkiar ajapawaruuiti.

⁹Nuna tusa turawarua nusha ¿atumsha uruk enentaimrumea? Ajan kuitamin aina tuma matsatuncha, ¿ajartin winaksha iturmainaita? Ajartin winitkugka nunaka kajeg utsak, nu ajanka chikichan susa inaimainaiti. ¹⁰¿Atumka chicham aarmauwa nuka ishichkisha aujsachukaitrum? Nuka tu aarmauwaiti: 'Jea jeamin aina chikichik kayan nakitrar pegkerchauwaiti tusar ajapamua nu ima wakerumain jasai. ¹¹Nunaka apu Yuus turayi, tuma asamtai ika shir enentaimtuinaji'.

¹²Nuna tusa timatai, judío apuri aina chichainak: Ina aujmatramas turamuk tu wekawai, tusar kajerainak achikar jukiartasa wakeruinayat, shuar nuna anturainak nukap

tuakaru asarmatai ashamainak ikukiaru”.

**Jesús tsanumrura
achikmi tusa timau**
(Mt 22.15-22; Lc 20.19-26)

¹³Tura ikukiar fariseo shuaran, tura Herodes shuar ainajai: Atum anagkeakrum Jesús chikichik inim-mau pachisrum iniastarma, turamsha waritik aimkat timatai, chicham tsanumrurarmi tusar akupkaruiti. ¹⁴Turawaram Jesúsán jeariar chicharainak:

“Jintinkartina, ameka chicham nekasa nuke etserme, chikich aina jintinkartamun pachisar pegkerchau chichainakaisha pachitsuk inaiyakum, shuar aina ashi metek enentaimtam nuka nekaji. Tuma asar amina iniajme: ¿Romanmaya apusha shuaran kuitrin yarurna ausha akimainashit? ¿Amesha uruk enentaimmea, atsa akimainchaukait?” tusar tuina.

¹⁵Nu tama Jesúska anagkeaku tamaunka nekau asa chichaak:

“¿Urukamtai winasha tsanura nekaprustasrumsha wakerutarme? Kuitcha urukua apusha suarme nu inaktursatarma, wisha iistajai”, tusa tinaiti.

¹⁶Nuna takai juki itarim wainak chichaak:

“¿Jusha yana yapiya nakumkamuita, tura jusha yana naarimpa aarmauwaita?” tusa tinaiti.

Jesús takai nita chichainak:

“Juka Romanmaya apu Césara nunauwaiti”, tusar tuina.

¹⁷Nuna tuinakai, Jesús chichaak:

“Apu Césarnauwa nuka nigki susatarma, tura Yuusnauwa nusha nigki susatarma”, tusa tinaiti.

Nuna tusa takai enentai jearcharuiti.

**Jakau aina nantartin
pachisa inimsamu**

(Mt 22.23-33; Lc 20.27-40)

¹⁸Nuna tuma waketrarmatai, saduceo ainasha Jesúsán weriaruiti. Nitaka shuar jakaru aina nuka nantarchartin ainawai, tusar tinu asar Jesúsán ininak:

¹⁹“Jintinkartina, Moisés papiin aar ikurtamuk: ‘Shuar ni yachi nuweena uchin akiitsuk jakamtaigka, ni wajen juki, uchin akinmainaiti, tura ni yachin uchiriyá nunin amajmainaiti’, tusa tinaiti. ²⁰Chikichik shuar siete yachigmau ajakuiti. Tuma chikichik nuweenawaiti, turasha uchin akii-tsuk jakauwaiti. ²¹Tumamtai ni yachi nuwen wajen jukinaiti. Tuma nusha uchinka akiitsuk jakauwaiti. Tumamtai chikishcha juki, uchinka akiitsuk jakauwaiti. ²²Tuma tumainakua, sieteya nuka ashi jinaawaruiti. Imatikainaksha, chikichikishcha uchinka akia-charuiti. Tura aishmag ashi jinaamtai, nuwasha jakauwaiti. ²³Nu chikichik nuwanak nua nuatainakua jinaawarua nusha, ¿atak nantainamunmasha yáki jukitnaita?” tusa tuina.

²⁴Nuna tuinakai Jesús chichaak: “Atumka Yuusa chichamegka nekachu asarum, nina pujutairiya nusha wainkachu ainarum nui tu chichakurme. ²⁵Jinaawaru nantartintin aina nuigka nuweenachartintin ainawai. Nayaimpinmaya shuar aina Yuusjai tuke matsamintin aina nujai metek artinaiti. ²⁶¿Atumka jinaawaru aina nantartintin pachisrumka, númi keamunam Yuus wajas Moisésán wantiintuk chicharuk: ‘Wiyaitjai Abraham, Isaac, Jacob aina nuna Yuusrinka’, tusa tina nu Moisésán papirin aarmauwa nuka

aujsachukaitrum? ²⁷Nuna tau asamtai, jinaawaru taji nuka iwákuapi matsatua tuinaji, Yuuska jakau ainan Yuusrinchuiti, antsu iwáku ainan Yuusriyaiti. Tumau aig atum aantratum chichau ainarme”, tusa tinaiti.

**Chicham yama nagkamchaku
umimain pachisa timau**

(Mt 22.34-40)

²⁸Chikichik shuar, chicham umiktintin jintinkartintin, Jesús shuar ainan nuka tu awai tusa itatmamtikamun antuku asa jeari iniak:

“¿Chicham umiktin aina nuiya yama nagkamchaku umimaincha tuwaita?” tusa tinaiti.

²⁹Nu tutai Jesús ayak:

“Chicham umiktarma timau aina nuiya yama nagkamchaku umimainka juwaiti: ‘Israel shuar ainatiram, apu ina Yuusriya nuke anturkatarma, apua nuka chikichikiti.

³⁰Tuma asamtai atumi apuri Yuusa nu ima senchi anetarma. Turakrum ima niinig enentaimsarum pujustarma, Yuusnau pegker aina nuke nekatarma, Yuus wakeramua nuke takastarma’. Yama nagkamchaku chicham umimainka nuwaiti. ³¹Chikishcha nujai metekmamtinaiti. Nuka juwaiti: ‘Atumek anenmamsarum chikich shuar ainasha anetarma tu aarmauwaiti’. Chicham umiktin nuna nagkasauka chikichka atsawai”, tusa tinaiti.

³²Nu tusa tima, chicham umiktintin jintinkartintin chichaak:

“Jintinkartina, yajau turutchau, ame wina turutam nuka nekasaiti. Ima chikichik Yuusak awai, chikich Yuus niya imauka atsawai. ³³Amina apuram Yuusa nu ima senchi aneta. Turakum ima niinig enentaimsam pujusta.

Yuusnau pegker aina nuke takasta. Yuus wakeramua nuke takasta. Tura chikich shuar ainasha ina iyashi aneaj turusrik aneta nuwaiti, ina tunaurin Yuus tsagkurtamratji, tusar tagkun maawar aesu jakaru aina nuna nagkasauka”, tusa tinaiti.

³⁴Jesús nu shuar shir enentaimsa chichaamun anturak chicharuk: “Ameka Yuusa inamtairiya nui waitka namput jatsme”, tusa tinaiti.

Nuna takai chikichkiksha Jesúsán inimain nekapsacharuiti.

**¿Cristosha ya weantukita?
tusar timau**

(Mt 22.41-46; Lc 20.41-47)

³⁵Jesús Yuus ememattasa iruuntai jeanam wayaa unuikartak pujus chichaak:

“¿Urukamtai chicham umiktinan jintinkartin ainasha Cristoka David weantuiti tusarsha tuinawa? ³⁶David, Wakan Pegker chichamtikam:

‘Apu Yuus wina apurun chicharuk: Wina untsuruini ekeemsata, tumawakmin wii amina shuaurum ainanka nepetkan, aminikaankan matsastinaitjai’.

³⁷David Criston wina apur tujaku aisha ¿uruk asaya David weantusha amainaita?” tusa tinaiti.

Nuna takai nukap shuar nui irunusha shir aneasar anturaina.

**Chicham umiktinan
jintinkartin ainan pachis
Jesús chichasmau**

(Mt 23.1-36; Lc 11.37-54; 20.45-47)

³⁸Jesús shuar ainan jintintuk: “Atumka chicham umiktinan jintinkartin aina, jaanch asarman nugkurar yujatan wakerin aina tumau airum pe aneartarma. Nitaka yujainaksha,

shuar ainasha emematus shir amikmatawarti tusar wakerin ainawai. ³⁹Iruuntai jeanam utsaanainaksha, ekeemtai pegker ainan etegkawar ekeemsattsa wakerin ainawai. Tura yurumak yuamunmasha pegker umikmaun yuattsar wakerin ainawai. ⁴⁰Nuwa waje ainan jeencha atankiar, shuar iruuntramunam ajapeen wajasar, Yuus aujeaji, tusar nukap sea seainakua iku yujau ainawai. Nuna tuma yujau ainaka chikichan nagkasau Yuus waitat suam artinaiti”.

**Nuwa waje kuitan Yuusnau
atii tusa egkeamu**

(Lc 21.1-4)

⁴¹Yuus ememattasa iruuntai jeanam Jesús wayaa Yuusnau atii tusa kuit egketainam ikatsek ekeemas, shuar kuitan egkenakai iiyak eketu. Tuma eketai wiakach ainasha kuitan nukap chumpina. ⁴²Tumainai nuwa waje wayaa nisha jimarchik jiru kuit cobre najanamun, imanis akikchaun egkea. ⁴³Nuwa nuna egkeamta wainak, Jesús ni unuina-tairin untsuk ikaanak chicharuk:

“Ju nuwa waje kuitrinchauwaitiat, ashi shuar egkena auna nagkasau egkeayi. ⁴⁴Chikich egkena auka, kuit ampintraun egkenawai, turasha ju nuwa waje kuitrinchauwaitiat, ni sumasa yumaintrinkisha ampir ikutsuk, ashi egkeayi”, tusa tinaiti.

**Yuus ememattasa iruuntai
jea yumpuam atinaiti tusa
Jesús etserkamu**

(Mt 24.1-2; Lc 21.5-6)

13 ¹Yuus ememattasa iruuntai jeanmaya jiinki Jesús wetatmaun nina unuinatairi aina chicharainak:

“Jintinkartina, amesha kaya pegker ainajai jeamkamua ju iisiana”, tusa tuina.

²Tuinakai Jesús nitan ayak:

“Ju jeamkamu pegker waintrum juka imaniskeka achatnaiti, tura kaya aina auka chikichik kayaksha chikich kayanam patatuka achatnaiti”, tusa tinaiti.

**Nugka meseatsaig wantinkartin
aina pachisa etserkamu**

(Mt 24.3-8; Lc 21.7-11)

³Nuna tusa ikuak, nain Olivos tutai, Yuus ememattasa iruuntai jeajai iinias aunam wearuiti. Jesús nui waka ekeemsamtaí, Pedro, Jacob, Juan, Andrés nu aina jeariar ininak:

⁴“Wait aneasam ujakratkata, ame timam nusha urutia nekascha tumatta, nu tsawan jeattak jakaisha, ¿wari wantiniartinaita?” tusa tuina.

⁵Tuinakai Jesús chicharuk: “Chikichiksha tsanurmarairum, pe aneartin ataarma. ⁶Nukap shuar wina naarun pachisar chichainak: ‘Wiyaitjai Cristonka’, tusar nukap shuaran tsanurartin ainawai.

⁷Maaniawartasa pampannaiyamu, tura maaninamu ashammaintitnaitrume. Tumakrumsha ashamkartin airpa. Yama nagkamchak nagkamartinka nu ainawai, turasha nugka mesera nagkanmauka nuchauwaiti.

⁸Nugka unnum matsamin ainasha mai imannumiag nagkamnaiyaware maaniartinaiti, nu iman tumainai nugka shikapchinmaya apusha mai tumaunumiag nagkamnaiyaware maaniartinaiti. Tura urtancha ashi nugkanam senchi urtinaiti. Tura tsukasha tepeatnaiti. Waitat yama nagkamnamuka nuwaiti”, tusa Jesús tinaiti.

**Wini surumankau ainatirminka
waitkarmasartin ainawai timau**

(Mt 24.9-14; Lc 21.12-19)

⁹“¡Aneaku atin ataarma! Atumnaka judío iruuntairi jea aina nui awaintamawar asuttamawartinaiti. Apu chichaman epegkin ainanam, chikich apu ainanmasha, atum wina nemartuina asaakrumin, nui ejétamawarmatai, wina pachittsarum nitasha ujaktinaitrume. ¹⁰Nugka mesera nagkanmau jeatsaig, wina chichamur uwentikartina nunaka, ashi nugkanam etserkartin ainawai. ¹¹Atumin apunam juramainakaisha, apuncha warituk aujsataj tuka enentaimsaírpa. Atumnaka nui ejétamawarmatai, nu titá tusa Yuus turamtatui, turamkai atum chichaktatrum nuka atumkeka chichakchattarme, antsu Wakan Pegkera nu chichamtikramkattarme. ¹²Tsawan jeakaigka maawarti tusar shuar aina ni yachinak anagka suriartinaiti, tura uchirtin ainasha ni uchirinak suriartinaiti, tura apartin ainasha ni aparinak shuarmawar maitin ainawai. ¹³Atum wina nemartin ainatirminka shuar aina ashi kajertamiartinaiti. Imatika kajertamainakaisha, atsantrarum winak nakarutir-meka uwemratin ainarme”.

**Ashammaintitnaiti
tusa etserkamu**

(Mt 24.15-28; Lc 21.20-24)

¹⁴“Yuusa chichamen etserin Daniel naartin, shir ashammainan pachis aarua nuna aujuka nekamainaiti. Nuka juwaiti: Atum nuna ashammainan pachis aarua nu Yuus ememat-tasa iruuntai jea pegkera nui waya wainkurmeke, Judeanam matsatirtir-meka mura tsekemain ainarme.

¹⁵Jea jimara ekeni jeamkamunam pujuinasha, jenianka warírinka jutsuk jiinmain ainawai. ¹⁶Tura ajanam takainak yujainasha jaanchin jukitjai tusar jea wakettsuk, kuamkag tsekemain ainawai. ¹⁷Nu tsawan atina nui, nuwa ajapruktin aina nuna tura nuwa uchin jurertin aina nujai wait anentainajai. ¹⁸Tsetsek tepeamunam etsekeam airum Yuus aujsatarma. ¹⁹Yuus yama nugkan najanawa imanaisha imanika waitujakchamun, atakea nuisha imanika waittsashtinan nagkasau shir senchi waitamu atinaiti. ²⁰Nu waitat imanian Yuus imijtsuk imatiksag inaiyakaigka, chikichik shuarkesha uwemmain ainatsui. Turasha Yuus ni shuar etegkramu ainan wait anentak, waitat aya weanak imijkatnaiti.

²¹Atum ainatirmin chikichik shuarkesha chichartamuk: ‘Jui Cristo pujawai iistarma’, ‘ai Cristoka pujumai’ amajtamainakaisha nekasapita titin airpa. ²²Nukap shuar chichainak: ‘Wiyaitjai Cristonka’ tuinasha artinaiti. Tura chikich wiyaitjai chichaman ‘Yuus akatturmatai etsernunka’, tusa tinu ainasha wininak, shuar wainchatai ainan nukap iwaintuinak, shuar Yuus etegkramu ainancha tsanumain akaigka, chikich shuar ainajai ashi tsanurartin ainawai. ²³Pe anearum pujustarma tusan, nunaka emtikan ujjarume”.

**Jesús winitnaitjai
tusa etserkamu**

(Mt 24.29-31; Lc 21.25-28)

²⁴“Nu waitamu nagkamaig, etsa etsantsuk káshi jastinaiti, tura nantusha etsantrashtinaiti. ²⁵Tumai nayaimpinmaya ya aina kake-niartnaiti. Imanina asarmatai,

nayaimpinmaya senchirtin ainasha ashi muchitrartinaiti. ²⁶Nu imani ai wii shuarnum akinawaitai nuna wina senchirjai, shir tsaaptin jasan nayaimpinmaya yuragminam pachitkau winakai, shuar aina ashi waitkartin ainawai. ²⁷Wii winakana wii etegkramur ashi nugka nagkatramunmaya aina yaruakrum ikaatructarma tusan nayaimpinmaya shuar ainan ishiaktinaitjai”.

**Númi higuera tutai
pachisa jintinkartuamu**

(Mt 24.32-35; Lc 21.29-33)

²⁸“Númi higuera tutai enentaimtusrum iistarma. Nu higuera nukarkamtai, atumka wári asat tepeatawai tusarum nekau ainarme. ²⁹Numamtuk wii tajarum nu imanisag ashi uminkaigka, yamaika shuarum akinawa nu tatinka ashi jeawapi titin ataarma. ³⁰Nekasa tajarme atak shuar matsamiartin aina nusha eke ashi jinuinatsaig juka uminkatnaiti. ³¹Nayaimpia auka nugkajai megkatatnaiti, turasha wii tajarum nuka imanisag uminkatnaiti”.

**Jesús tatinka tsawan
nekantsui tusa timau**

(Mt 24.36-44; Lc 21.34-36)

³²“Turasha wari tsawantaik, tura etsasha urutam aig tatinaitaj nunaka chikichkiksha nekainatsui. Tura nayaimpinmaya shuar tuke matsamin ainaksha nekainatsui. Tura wii Yuusan uchirinkisha nekatsjai, antsuwina aparuk nunaka nekawai.

³³Nu uminkatnuka nekachu asarum, atumka enentaimkauk matsamsarum, Yuus auju matsamtarma. ³⁴Nuka shuar chikich nugkanam wetin asa, eke wetsuk inatairi

ainan yaruak ikaanak takatan akantur tinamak, waitin kuitamnuncha chicharuk: Shir aneaku pujusam kuitamata, tusa ikuak wuwa numamtinaiti. ³⁵Iimkau pujutarma, jennusha urutiak, etsasha uruka aig tati, kintamkumpash tati, tumachkusha ajampek jasa aimpash tati, tumachkusha atash shinainpash, káshikmaspash tati nuka nekatsrume. ³⁶Kanú matsatutirmin pachiachmau winak awaktamkairum, ³⁷junaka ima atumnakka tatsujrume, ashi shuaran takun tajai: ¡Iimkau, aneaku matsamsatarma!” tusa Jesús tinaiti.

**Jesús achika maami
tusar chichamruina**

(Mt 26.1-5; Lc 22.1-2; Jn 11.45-53)

14 ¹Jimarchik tsawan asa, jii-sat Pascua, pan levadurajai pachimtsuk inaraamu yutaiya nu jii-sat jeatin ai, sacerdote apuri aina, chicham umiktinan jintinkartin ainajai, Jesús anangka achikar maawartasa chichamruina. ²Turasha jii-sat aigkika turachmi, shuar aina nuna akasmatainak jianaimain ainawai tusa tuina.

**Betanianmaya nuwa Jesús an
kugkuinjai ukatkamu**

(Mt 26.6-13; Jn 12.1-8)

³Jesúska yaakat Betanianam Simón lepra tukumu pegker amajsamua nuna jeen pujau. Nui pujaun chikichik nuwa, botella alabastro najanamunam kugkuin pachimrachmau nardo tutai senchi ukugkuarmaun shir akikan sumak takus, Jesús mesanam eketun jeari, muuknum ashi ukatkauwaiti. ⁴Nu turamun ni unuinatairi aina wainkar kajekaru, tumawar chichainak: “¿Urukamtai shir akiknasha aan-trasha wasureawa? ⁵Au surukar

trescientos kuit denario juki kuitrinchau ainan yaimainajama tusar nuwan pegkerchau chicharaina.

⁶Jesús nuna antuk nitan chicharuk: ‘¿Urukamtai atumsha ju nuwasha kajerarme? Juna ni aitka juka pegkerchaunka aitkatsui. ⁷Kuitrinchau ainaka atumjai tuke pujuartinaiti, nui nitaka atum wakeramuka tuke yaimainaitrume, antsu wii atumjaigka tuke pujuschatnaitjai. ⁸Ju nuwa wina iyashrui kugkuinjai ukatrua junaka wii ikuntsatin asamtai aitkarayi. ⁹Nekasa tajarme, ju chicham uwemtikartina juna ashi nugkanam yujasar etserainaksha, ju nuwa wina aitkara junaka ashi pachisar chichaartin ainawai’ ”, tusa Jesús tinaiti.

Judas Jesús an surukmau

(Mt 26.14-16; Lc 22.3-6)

¹⁰Nuna tusa tinu ai, Jesús a unuinatairi doce ainanmaya Judas Iscariote naartin, chikichik jiinki sacerdote apuri ainajai chichaman umik, Jesús an suruktasa wuwaiti. ¹¹Tuma sacerdote matsatun jeari, tu achimainaitrume tusa shir etserkai, shir anenak kuitan akiktajme tusar tiaruuti. Tuinakai Judascha, uruk anangkanak surukaj tusa, enentaimtu weká.

**Jiisat Pascuatin yuatin
umiktarma timau**

(Mt 26.17-19; Lc 22.7-18)

¹²Pascua jii-samat nagkamnamunam, pan levadurajai pachimtsuk inarkamu yutai oveja maar aeseaku Yuus ememattai jeau asamtai, ni unuinatairi aina Jesús an ininak:

“¿Ju jii-sat inagkakur, aagkuantai yuatnusha tui umiktatjia?” tuina.

¹³Tuinakai ni unuinatairi ainan jimaran akupeak chicharuk:

“Wetarma, tumarum yaaktanam jeaakrum shuar ichignanam entsa shikik waketu wainkattarme, turarum nu nemarkirum, ¹⁴ni jea wayakai, jeentin chicharkurum: Jintinkartin chichaak: ¿Wina unuinatair ainajai iruuntran jiisat Pascuatin yumaintrusha tuwait?” tusa turamui titarma.

¹⁵“Tusa tama ni jea yaki tesamu uuntan shir umikmaun isha ashi metek utsaanmainan inakturmas-tattrume, turutmamtai nui umiktarma”, tusa tinaiti.

¹⁶Jesús takai nitasha ayu tusar wear, yaaktanam jeaakma ni timaunka ashi imatiksag wainkar, Pascuatin yuatnunka nui umikaru.

**Suram atintrin
etsertumakmau**

(Mt 26.20-25; Lc 22.21-33;

Jn 13.18-30)

¹⁷Káshi jasmatai Jesúscha nina unuinatairi ainajai nu jeanam

utsanawaruiti. ¹⁸Tumawar yuinak iruunmaunam Jesús chichaak:

“Nekasa tajarme, atum ainarum juiyag wijai yua nuke winaka surut-kattawai”, tusa tinaiti.

¹⁹Nuna takai ashi nitaka senchi wake mesekar iruuntsar chiki chikichik chichainak: “¿Apuru, wikaitaj?” tusa tuina.

²⁰Nuna tuinakai Jesús chichaak:

“Wina surutkatnuka chikichik platonmag wijai jimarak yua juwaiti.

²¹Turasha wii shuarnum akinawaitaj nunaka wina pachittsar aararua nuna umiktasan werajai. Turasha shuar wina surutkatta nunaka wait anentajai. Nekas nigka akinmainchauntsuk akinawaitti”, tusa tinaiti.

Jesús inagnaku yuamu

(Mt 26.26-29; Lc 22.14-20;

1Co 11.23-26)

²²Eke yurumak yuaku iruunmaunam Jesús pankan juki, Yuusan



(Mr 14.22-23)

maaketi tina puur nitan tinamak chichaak:

“Ju yuatarma juka wina iyashrua numamtinaiti”, tusa tinaiti.

²³Nuna tusa tinamak inaiyak, umutain shikikam eketun juki, nunasha turusag Yuusan maaketi tina nitan susau, turam ashi metek umararuiti. ²⁴Tura ashi umararmatai chicharuk:

“Juka shuar ainan nukap uwemti-krattsan wii mantamnakun numparun puartataj nuna iwainawai. Tura wina numparun puaran wii yamaram chichaman etseraj nunaka ashi umiktatjai. ²⁵Nekasa tajarme, wika ju uva neren yumiri ijuramua junaka atak awenanka umarchatnaitjai. Antsu tsawan uminkai, Yuusa inamtairin atumjai iruunkun umartinaitjai”, tusa tinaiti.

**Pedron waitruattame
tusa Jesús ujakmau**

(Mt 26.30-35; Lc 22.31-34;
Jn 13.36-38)

²⁶Nuna tusa kantamtain kanta-mawar inagnak Olivosan naintrin wearuiti. ²⁷Tumawar nui jea Jesús chichaak:

“Yamai ju káshia juik atum ainatirmeka winaka ashi ajapa ikurkittarme, chicham aarmaunmasha aitkasag nunaka tawai: ‘Ovejan kuitamnun maawartinaiti, turawarmatai oveja ainaka kanarartin ainawai’ tu aarmauwaiti. ²⁸Turasha ataksha nantakin, atumka Galileanam weatsrumnak wiyaa wetatjai”, tusa tinaiti.

²⁹Nuna takai Pedro ayak:

“Chikich aina ashi ajapa ikurmainakaisha, wika aminka turashtajame”, tusa tinaiti.

³⁰Takai Jesús chicharuk:

“Nekasa tajame, ju káshia juik atash jimara shinatsaig, wika au shuarnaka wainchauwajai tusam tresa imajnia waitruattame”, tusa tinaiti. ³¹Tamasha Pedro chichaak:

“Amina mantamainakaisha, amijai jakamij tusan waitruashtatjai”, tusa tinaiti.

Pedro nuna takai, chikich ainasha ashi nunisag tuina.

**Jesús Getsemanínam
pujus Aparin seamu**

(Mt 26.36-46; Lc 22.39-46)

³²Tuinakai juakiar Jesús nina unuinatairi ainajai númi arakmau Getsemaní tutainam jeawaruiti. Tura nitan chicharuk:

“Jui atumka ekeema jatarma, tumarmin ai wena Aparun aujsatjai”, tusa tinaiti.

³³Tusa weak Pedron, Jacobon Juanjai juki nitajai wesa, senchi wake mesemar nekapeak kuntuts enentaimu.

³⁴Imania asa chichaak:

“Senchi wake mesemar nekapeakun jamain nekapeajai, atumka jui pujusrum wijai metek kanutsuk pujutarma”, tusa tinaiti.

³⁵Tusa ikuak Jesúska ishichik kuwasag tikishmar, tsuntsumaa Yuusan aujeak: “Apaachi, turumainaitkumka wii waitmaina nuka inaimamtikrusta. ³⁶Wina Aparu, ameka ashi turumainaitme. Wait aneasam wii waitmainaitaj nuka inaisata. Turasha wii wakeramuka ahati, antsu ame wakeramua nu atii”, tusa tinaiti.

³⁷Tusa Yuusan aujas ikuak, ni apujkimurin jeari iikma kanarar tepenan wainak, Pedron chicharuk:

“Simónka ¿ameka kanuk tepam? ¿Chikichik horaksha kanutsuk puju-mainchau nekapeam? ³⁸Iwanch nekapramkai tunau takasairum, kanú tepetsuk shintagkrum, Yuus auju pujutarma. Atumi wakanigka pegkera nunak takastasa senchi wakerawai, tumaig atumi iyashi ima kakakchau ainawai”, tusa tinaiti.

³⁹Nuna tusa ikuak ataksha wakетки, nuik timaurinak turusag Yuusan aujsauwaiti. ⁴⁰Tuma ataksha wakетки iikma, kari senchi pujainakai, kanar tepenan wainkau. Imanik kanú tepena asar, Jesús aujmasa aimainchau nekapraru. ⁴¹Tumaina asarmatai tresa jui waketruki tari chichaak:

“Yamaika kanakrum ayama puju-tarma. Wii shuarnum akinawaitaj juna achirkar shuar tunaun takau ainanam surutkartata nuka tsawan uminkayi. ⁴²Yamaika nantartarma wearmi, wina surutkatta nuka winawai”, tusa tinaiti.

Jesús achika jukimu

(Mt 26.47-56; Lc 22.47-53; Jn 18.2-11)

⁴³Nuna tusa Jesúska eke chichaak wajai, Jesúska unuinatairi doce ainanmaya chikichik, Judas nukap shuaran yaruak, kuchiin, númi ainajai takaru jeariaru. Nitaka sacer-dote apuri aina, chicham umiktinan jintinkartin aina judío apuri ainajaimak akupkamu asar winina. ⁴⁴Judas Jesúsán suruktin, shuar ainan chicharuk: “Wii iwijran kugkuastataj nu Jesúska atatui, achikrum shir emetarum jukitarma tusa, chicham-naka umirkauwaiti”. ⁴⁵Tura asa wári Jesúska jeari chicharuk:

“¿Jintinkartina pujamek!” takug pagkuk kugkuasuíti.

⁴⁶Tusa tai shuar ainaka achikar shir emetawaru.

⁴⁷Nuna tumainakai, Jesúska unuinatairi ainanmaya chikichik ni kuchiirin juakug, sacerdote apuri inatairin kuishin awatti asankau-waiti. ⁴⁸Turamtai Jesús, nu shuar ainan chicharuk:

“¿Urukamtai kasa achikartasa iturin aina imatikruarmesha, kuchii aina, númi ainajaimak takaru wini-trarme? ⁴⁹Wii atumin jintinkun káshi kashinig Yuus ememattasa iruuntai jeanam atumjai tuke puju-waj nuika jutikruarum achirchau ayarme. Turasha juka yamaika Yuusa chichame aarmauwa nu uminu asamtai aitkararme”, tusa tinaiti.

⁵⁰Nuna tusa Jesúska chichaig, ni unuinatairi ainaka Jesúska ashí ajapa ikukiaruítí. ⁵¹Tumaig chikichik natsa ayatik jaanch wagarman punumar ukunam pataas wetatmaun achikaruítí. ⁵²Tura shir emetataj tama jaanchnaka awiik ikuak misu tsekegnaiti.

Sacerdote apuri pujamunam Jesús ejému

(Mt 26.57-68; Lc 22.54-55, 63-71;
Jn 18.12-14, 19-24)

⁵³Jesúsán jukiar sacerdote apuri pujamunam ejénaruítí. Tumawar-matai ashí sacerdote apuri ainaka, judío apuri ainasha tura chicham umiktinan jintinkartin ainajaimak iruunraruítí. ⁵⁴Pedrosha ikag pata-tus wera werakua sacerdote apuri jeen aarin jeaan, Yuus ememattasa iruuntai jean kuitamin ainajai iruun-ar jina anamuk eketu.

⁵⁵Tumai sacerdote apuri aina, judío apuri ainajaimak ashí iruunrar

Jesús makumakur mantamna-mainan eataina, imatruinaksha ni makumainka atsau asamtai neka-rainachu. ⁵⁶Nukap shuar imatrua Jesúsan aantar tsanumruinakai, nui irunuka nuka antrarum tarume tusa tuina. ⁵⁷Tuinakai chikich shuar wajakiar aantar waitruinak:

⁵⁸“Nekas antukmaji ni chichaak: ‘Shuar aina Yuus ememattasa iruuntai jean jeamkarua juna wii yumpugtatjai. Turan tres tsawantai ataksha imatiksanan shuar ainasha takaschamun jeamkattajai’”, tusa timayi tuina.

⁵⁹Nuna tuinakaisha chikich ainaka yupichu nekasapita ticham-nau nekapena.

⁶⁰Sacerdote apuri nitajai eketu wajatki Jesúsan chicharuk:

“¿Urukamtai nuna imatrutmai-nakaisha ishichkisha aimtsume? ¿Nunasha waritmauna ame timaur-min pachisarsha imatrutmainawa?” tusa tinaiti.

⁶¹Tamasha Jesúska aintsuk wajau. Tumakai sacerdote apuri ataksha iniak:

“¿Ame nekas Cristo Yuusa uchirig-kaitam?” tusa tinaiti. ⁶²Tusa tama Jesús ayak:

“Ee, wiyaitjai, atum wii shuar-num akinawaitaj nuna, Yuus ashi senchirtina nuna untsurini eketun nayaimpinmayan jui winakun, yuragminam pachitkau winamu waitkatin ainarme”, tusa tinaiti.

⁶³Nuna takai sacerdote apuri jaanchrin japiki jak chichaak:

“¿Ashi antuinamunam ta jama! ¿Nuiyasha ya nakajia? ⁶⁴Ashi atumsha ni Yuusan pegkerchaun chichara nuka anturkaurme. ¿Atumsha uruk enentaimrume?

Takai ashi aimainak:

“¿Aya mantamati!” tusa tuina.

⁶⁵Tusa tuinakai, chikich aina Jesúsa usuktan nagkamawaru. Nuna chikich turuinakai, jiin epetkar yapinam awatainak:

“¿Ya awattamin nekaakia!” tusa tuina.

Yuus ememattasa iruuntai jean kuitamin ainasha Jesúsnaka yapinam awataina.

Pedro ju shuarnaka wainchauwajai tusa timau

(Mt 26.69-75; Lc 22.56-62;

Jn 18.15-18, 25-29)

⁶⁶Nuna imatikainai Pedroka apu jee aarin eketun, nuwa sacerdote apuri inatairi jearin. ⁶⁷Tuma wainak, jina anamuk ekeemtatmaun wajas ii wajatu. Tura chicharuk:

“¿Amesha Jesús Nazarenumia nujaimpapi wekainaitmea?” tusa inia.

⁶⁸Tama Pedro chichaak:

“Wika nekatsjai nusha warintsuk turutam”, tusa tinaiti.

Tusa inaiyak wayaamunmani jiinkin, tumai atash shinukuiti. ⁶⁹Apun takarnusha ataksha waketruki iis, nui chikich irunun chicharuk:

“Ju shuara juka Jesúsjai wekainayi”, tusa tinaiti.

⁷⁰Tutai ataksha waitrak:

“Wika wainchauwajai”, tusa tinaiti. Ishichik asag awentsag nui shuar matsatu Pedron ininak:

“Nekas amesha au weantuitme. Ameka Galileanmaya shuaraitme, chichaakmesha aiya chichau arma nujai metek chichame”, tusa tuina. ⁷¹Imatruinam Pedro Jesúsan shir pegkerchaun chicharuk: Yuuscha waitai tajai:

“Wika au shuarnaka wainchauwajai ¿Ya pachisrumtsuk nusha tuinarum?” tusa tinaiti.

⁷²Nuna taig atash jimara shinukuiti. Tumamtai Pedro Jesús chichaak: “Atash jimara shinatsaig, wika au shuarnaka wainchauwajai tusam tresa imajnia waitruattame”, timaun anear senchi útnaiti.

Pilato pujamunam Jesús ejému

(Mt 27.1-2, 11-14; Lc 23.1-5;

Jn 18.28-38)

15 ¹Tsawaarmatai sacerdote apuri aina, judío apuri aina, chicham umiktinan jintinkartin aina, apu ainajai ashi iruuntrar, Jesús a jigkarar jukiar apu Pilaton ejétiaruiti.

²Nu tura ejétim Pilato iniak:

“¿Judío ainan apurim nekas amekaitam?”

Tusa iniam Jesús ayak:

“Ame turutam nuka nekasaiti”, tusa tinaiti.

³Sacerdote apuri ainaka aantar nekaschaunak tsanumruina asarmatai, ⁴Pilato ataksha waketrusag iniak:

“¿Ameka nuna imatrutmainakaisha ishichkisha aimtsumek?” tusa tinaiti.

⁵Turasha Jesúska ishichkisha aikchauwaiti. Tumakai Pilatoka enentai jearchauwaiti.

⁶Jiisat Pascuatin shuar aina nu jiinkiti tuinakai, achikmaun chikichkinak Pilato tuke jiiskee ajakuiti. ⁷Cárcelnum chikichik shuar



(Mr 14.69)

Barrabás naartin, yaunchuk chicham aepruniamunam shuaran maa asamtai, achikam egketu. ⁸Tuma asamtai nukap shuar aina Pilaton jeariar chicharainak: Ii iturnaj nuka yamaisha aitkasmek chikichik shuar akupkata tusar tuina. ⁹Tuinakai Pilato shuar ainan iniak:

“¿Jesús, judío apuriya nu, jiinkiti tusarmesha atumsha wakerarmek?” tusa tinaiti.

¹⁰Pilato tina nunaka sacerdote apuri ainaka tukeneas kajerainakpapi wina itartiaria tusa nekau asa nunaka tinaiti. ¹¹Turasha sacerdote apuri ainaka, Jesús jiinki tusar senchi nakitaina asar, shuar ainan chicharainak:

“Atumsha Barrabás jiinkiti tuserum titarma”, tusar akattraruiti.

¹²Pilato shuar ainan iniak:

“¿Atum judío apuri tarum nunasha iturkati turutrumea?” tusa tinaiti.

¹³Tusa inimkai senchi chichainak:

“Auka numinam ¡achinar mantamnat!” tusa tuina.

¹⁴Tusa tuinakai Pilato chichaak:

“¿Turasha wari tunauna takasia?”

Nuna takaisha nitaka senchi chichainak:

“¡Achintrati! ¡Achintrati!” amajaina.

¹⁵Imatruina asamtai Pilatosha shuar ainajai kajernaitan nakita asa, Barrabásan jiiyak, Jesús asutiarum numinam achiirum maatarma tusa suntar ainanam surukuiti.

Jesúsán suntar aina waitkasmau

(Mt 27.27-30; Jn 19.1-3)

¹⁶Turamtai Jesúsán suntar aina jukiari apu jeen aarin ejénier, suntar ainan ashi ipawar iruuntraruiti.

¹⁷Turawar ni nugkutairin awitkar, apu nugkutairin yamakaitkaun anugkrar,

etsegkrutai jagki najanamun etsegkrumtikaruiti. ¹⁸Tura wishikainak emematainaji tusar senchi chichainak: “Judío ainan apuri emematiarmi”, tusar imatruina.

¹⁹Imatruinak numijai muuknum awatainak usukina, tura emematji tusar tikishmataina. ²⁰Tusa wishi wishikainakua, nugkutai yamakaitkaunka awitak juruinak, ni nugkutairinak anugkar, nui numinam achirar maawartasa jukiariuiti.

Jesús númi yapajiamunam achirmau

(Mt 27.32-49; Lc 23.26-43;

Jn 19.17-30)

²¹Jesús ni achintratin númi yapajiamun yanak wesa, kakaarcham nau nekapeakai, Cirenenmaya shuar Simón naartin, Alejandro, Rufo aparriya nuna, ajan takak wu yama taanak wainkar, nuke nagkamaina asar chicharainak: Ju ame yanakta tusar ayanak jukiariuiti. ²²Jesúsán jukiari nain Gólgota tutainam ejénieruiti. Chicham “Gólgota ta nunaka muka nain” taku tawai. ²³Nui ejénier najaimakchati, tusar umutain vino tutain, mirra puari pachimramujai Jesúsán susaru, turamsha umarchauwaiti. ²⁴Tumamtai Jesúsán númi yapajiamunam achirariuiti. Turawarmatai suntar aina Jesúsá jaanchrin jurukiari, yáki nepetmakat nu jukiti tusar nakurutain nakuruina.

²⁵Jesúsánaka etsa nueve jasa ai achiraru ainawai. ²⁶Jesúska tumau asamtai achiaji, tusar ni chaikin tablanam aak:

JUDÍO SHUARA APURIGKA JUWAITI, tusa aatar anujtuku ainawai. ²⁷Jesúsán númi yapajiamunam achinak jimar shuaran shir pegkerchau ainan achirar, chikichnaka ni untsurini,

tura chikichnaka nina menarini achirar nenasaru ainawai. ²⁸Yuusa chichame aarmaunam chichaak:

“Tunau ainajai irumra nekapmam atinaiti timauka”, tu uminkauwaiti. ²⁹Shuar aina nu ayaamas nagkamainaka muuken peasar, pegkerchau chichaarainak:

“Yuus ememattasa iruuntai jean yumpugkan tres tsawantaik jeam-mainaitjai tinam nusha zurukamtai anisha netame? ³⁰¡Ani nematsuk akaikim uwemrakia!” tusa tuina.

³¹Sacerdote apuri ainasha, chicham umiktinan jintinkartin ainajai iruunar Jesúsán wishikainak:

“Chikichnaka uwemtiknayi, tumauwaitiat nigkika uwemtikma-meatsui. ³²Nekas Israel shuar ainan apuriyaitkugka, achinar neta au akaikiti, tumamtai isha nekaspapita tiarmi”, tusa tuina.

Jesúsjai metek achiram netuinasha tumasag pegkerchau chicharaina.

³³Etsa tutupnira ai ashi nugkanam káshi jasu, tuma nukap asa etsa teenta ai, ataksha tsaaptin jasuiti.

³⁴Eke imanik káshi jas ai Jesús senchi unsumuk: “*Eloi, Eloi, ¿lema sabactani?*” tusa tinaiti. Nunaka:

“Wina Yuusru, wina Yuusru, ¿urukamtai winasha inaitusume?” taku tinaiti.

³⁵Shuar nui iruunainaka nuna antukar chichainak:

“¡Antu jakua, Elías Yuusa chichamen etserin ajakua nuna unswawai!” tusa tuina.

³⁶Tuinakai chikichik shuar nui wajau, tsekegki umutain vino tutai churuin pujuttamaun, yumi mukuntai esponja tutain juakug ajug inijar, númi ichipkamunam etea, Jesúsán umarti tusa suak:

“Tismi, Elías juna akaktasa winitchatpash, nu wainkarmi”, tusa tinaiti.

Jesús jakamu

(Mt 27.50-56; Lc 23.46-49; Jn 19.30)

³⁷Nuna tai, Jesús senchi unsumuk jakauwaiti. ³⁸Tumamtai Yuus ememattasa iruuntai jeanam jaanch ajaamu auka yakini nagkamna jimapetuk achinakuiti. ³⁹Tumamtai Romanmaya suntara capitánkri Jesús achirmaunam ayaamas wajau, Jesús imatak unsumka jamun wainak chichaak:

“Ju shuarka nekas Yuusa uchiri ajakuiti”, tusa tinaiti.

⁴⁰Nuwa ainasha ikag ii iruuntuina. Nui María Magdalena, chikich María Jacob ekeuwa nuna Josénscha nukuriya nu, chikich nuwa Salomé, nu aina ii wajaina. ⁴¹Nu nuwa ainaka Jesús Galileanam pujakai, nemarainak umiru jakaruuti, nuiyasha nukap nijai iruunar Jerusalén kaunkarua nujaimak ii iruuntuina.

Jesús ikusmau

(Mt 27.57-61; Lc 23.50-56; Jn 19.38-42)

⁴²Nu tsawan kintamai kashinia nui ayamtai tsawan atin asamtai, takatan umikartasa ashi takainai, ⁴³shuar José naartin Arimateanmaya taawaiti, nisha apu aina iruunainamunam iruunin, Yuus inamunancha wainkattasa wakerin asa, arantsuk Pilaton weri, Jesúsán iyashi ikustajai tusa seawaiti. ⁴⁴Nu tusa seam, Pilato enentai jearchauwaiti. Tuma capitánkan unsumuk itan: “Jesús nekas jakamka”, tusa iniasuiti. ⁴⁵Tutai capitán ayak: Jakamai tusa tinaiti. Tama Pilato Joséns chicharuk:

“Jesúsa iyashigka jukita”, tusa tinaiti.

⁴⁶Tama Joséssha Jesús jaka yaki nemattamaun akaki, jaanch puju pegker sumakmaujai punuaruiti. Tura pampanam wa taimunam egkea, tura kaya uuntan juki shir apujtua ikuknaiti. ⁴⁷Nui ikuamun María Magdalena, María Josén nukurijai wainkaruiti.

Jesús maamu nantakmau

(Mt 28.1-10; Lc 24.1-12; Jn 20.1-10)

16 ¹Ayamtai tsawantan inagkakiar, nu tsawantaik etsa akaikin ai, María Magdalena, María Jacobon nukuri, Saloméjaimak Jesúsa iyashi ukatkatnun perfume ainan sumakaruiti. ²Tura kanar tsawainak, domingo tsawantin, etsa yama wakai, Jesús ikusmaunam wearuiti. ³Tuma wesar chichainak: “¿Yáki kaya uuntan apujtuawarma nunasha uratramtaji?” tusar tuina. ⁴Tusar jeariar iikma kaya uun apujtuamuka ekemak atatmaun wainkaruiti. ⁵Tura utuawar iikma, shuar natsa jaanch pujun nugkuaru untsurnumani eketun wainkar ashamkaruiti. ⁶Ashamam nui eketu nuwa ainan chicharuk: “Ashamrukairpa. Atumka Jesús Nazaretnumian maawarma nu earne. Ikusarma nu taarum iistarma. Nigka aneantu asa, juigka atsawai. ⁷Wári werum Jesúsa unuinatairi aina nu ujaktarma. Turakrum Pedrossha ujaktarma. Jesúska nitan tina nunisag niya eemak Galileanam wetatui. Tumamtai ai wainkartatui”, tusa tinaiti.

⁸Nu tusa tama nuwa ainasha jinar nuna wainkaru asar, kurakmaikia tseketaik shiakaruiti. Imanik sapijmakaru asar, chikichik shuarnaksha tumayi tusarka ujakcharuiti.

Jesús maamu nantaki María Magdalenan wantiintukmau

(Jn 20.11-18)

⁹Jesús maamu domingotin, káshikmas nantaki yama nagkamchakka María Magdalenan siete iwanch egkemtuamun jiir utsantak agkanmamtikawa nunaa wantintukuiti. ¹⁰⁻¹¹Turam Jesúsan nemarkin aina wake mesemar nekapenak, útu matsatun jeari ujak:

“Yamaika Jesúska nantaki, wina wantinturkamtai, wii ima shir wainkamjai”, tusa tinaiti.

Nu tamaun antukarsha nekasapita ticharu ainawai.

Jesús ni nemarkin ainan jimaran wantintukmau

(Lc 24.13-35)

¹²Aruma nui ni nemarkin aina jimarchik kanakiar, jinta wetatmaun wantintukuiti. Turasha nitanka María Magdalenan wantintukmaun tumaska wantintutsuk nisha iimtin jas wantintukuiti. ¹³Tuma wantintukam, nitasha wake-tar kaunak jea matsatun ujainak: Jesús wainkaji tusar tiaruiti. Tuinamsha nunasha nekasapita tuinawa ticharu ainawai.

Jesús ni unuinatairi ainan chicham uwentikartina nu ashí nugkanam etserkatarma tusa ishiakmau

(Mt 28.16-20; Lc 24.36-49; Jn 20.19-23)

¹⁴Tumainakai Jesús maamu nantakin wainkaji tusar tuinakaisa, nekasapita ticharu asarmatai, Jesús ni unuinatairi mesanam eketainan wantiintuk chicharuk:

“¿Urukakrumea wina waitkau aina ujatmainakaisha nekasapita turuttsurme?” tusa tinaiti. ¹⁵Nuna tina chichaak: “Chicham pegkera nu ashi nugkanam werum, shuar aina ashi ujaktarma. ¹⁶Turakrumin nita nuna antukar nekasapita tusar nemartuinak entsanam mainaka uwemrartin ainawai. Antsu shuar nu etsermaun antuinayat, nekasapita tuinachuka waittanam wear-tin ainawai. ¹⁷Ju iwainamua juka wina nekas pujawapi tusar umirtau ainajai atinaiti. Iwanch shuaran egkemtua pujuruncha wina chichamrujai jii-rar ishimitin ainawai, tura chicham nita chichashtairincha chichartin ainawai. ¹⁸Atum wina nemartautirmeka nápi asatmiarmataisha jakashtin ainarme.

Tura umutain tseasan egketramawar amasarmatai umakrumsha jakashtin ainarme. Ja ainasha atum achiarminig Yuus pegker amajiartinaiti”, tusa Jesús tinaiti.

Jesús nayaimpinam wemau

(Lc 24.50-53; Hch 1.9-12)

¹⁹Nuna tina inaiyak, nayaimpinam weak takunnaiti. Tuma Apari pujamunam waka, Yuusa untsurini ekeemsauwaiti. ²⁰Jesús nayaimpinam wematai, ni unuinatairi ainasha ashi nugkanam yujasar, chicham nekas pegkera nuna etseraina. Tumainakai apu Jesús nitan yayák, shuar ainancha chicham etsermaun paan nekamtikuk, nita wainchatai ainancha nukap iwaintukuiti. Maake, nunis atii.